


NJILA WÀ NZAMBÌ

MULONGOLOLA BWÀ DITUKÙ EDI

 ...katancì kakesè cyanààna patùdì twinyika mitù yètù apa.

Taatù wetù wa mu Dyulu, tudi tuKwela twasàkidila bwà Yesù Kilistò, bwà milayi Yèndè minènè yidìYe mutùpèèshe. Tudi tuKwela twasàkidila bwà bintu byònsò ebi. Tudi ne myoyi yizùka bikolè kaaba aka mu cimenga eci munkaci mwà beena Kilistò balenga aba. Tudi tutèkemenà bwà kuMumòna ùkwàta mudimu munkaci mwètù mwikàle ùleeja bwikadi Bwèndè, ùpèèsha bantu diitabuuja, ùbàsonsola bwà kwitabuujabò. Ki kiipàcilà kèètù kàà kwikala kaaba aka, Taatù. Tudi bamanyè ne tudi mwà kuKweyemena. Katwàkwediibwa màyi ku makàsà to. Bwalu tudi tulòmba nùnkù mu Dìna Dyèndè. Amen.

Nudi mwà kusòmbaayi.

Mvwa ne disànka dyàbùngì mu dindà emu bwà kudyà didyà dyà dindà edi ne kasùmbù aka kakesè kàà bambi mu cimenga emu. Ne pa nànkù tudi...Ngeela meeji ne bà—bànà bèètù mbacikwàte pa mikàbà yà mèyi bwà muntu yèyè naaci dijinga. Cikondo cyà dikèmà cyà bwòbùmwè citùdì bapetè's wè. Nènkù mpindyewu, dilòòlò edi ndilòòlò dyètù dibiidi, twenda tudìlongolola mu njila. Pa nànkù mpindyewu, tudi tutèkemenà ne Mukalenge neàtambe kunùbènèsha bònsò byà biyiila ne panshi.

Ngeela meeji ne ndi munkaci mwà kutàngila mulundà wanyì mwìmpè, Mándàmù Upshaw, musòmbè mwab'ewu, Mwanèètù wa bakàji Upshaw. Mukalenge akubènèshè. Ndi mvùluka Mwanèètù wa balùme Willie Upshaw. Mwà mupetè mukàndà wà kudi mwanèètù wa bakàji awu dīnga ditùkù ne fòtò wa Mwanèètù Willie, Congressiste. Nànkù, yèyè—yèyè ùvwa mucibùkile pànshi munda mwà bidimu bitwè ku makùmi àsambòmbò ne bisambòmbò.

Ùvwa mu disangisha dilòòlò kampànda, mèmè kumumòna mu cikèènà-kumòna, musòmbè, ùpìcila mu batèèleji, ne nkooci wendè pambidi, mwinàme pànshi. Ùvwa mu dikalù dyà balèmà ne mabaya à balèmà, bu munùvwa nwènù bònsò bamumanyè amu, ki Mukalenge Yesù kumusàngàjaYè dilòòlò dimwèdimwè adi. Nènkù ùvwa ne diitabuuja too ne mwàkafwàyè.

Tudi tudyùmvwa bapèèbwe bunèeme, dilòòlò edi, mùdì mukàmbà wendè musòmbè kaaba aka. Ùvwa ne bidimu bùngì munyi pààkayàye bwà kamònangana ne Mukalenge? Ùvwa ne bidimu bīngà? [Mwanèètù wa bakàji Upshaw ùdi

wàndamuna—Muf.] Mushààle ne mwoyi too ne ku bidimu makùmi mwandamukùlù ne bisambòmbò. [Mwanèètù wa bakàji Upshaw ùdi ùfila bujaadiki bwà lufù lwèndè.] Mmuyè mu Dyulu bwà kiikala ne. . . Tudi ne kusàkidila bwà bantu banène, balwanganyi banènè bàà mvità yà diitabuuja.

Mpindyewu, dilòòlò edi, bìdi ne, katwèna baswè kunùlama ntántà mule to. Tuvwa banùlamè basambùke ne tusunsa dikùmi pa díbà dilòòlò dishààle, kushààle tusunsa makùmi àbìdì bwà díbà dikùmi. Tutu pa ciibidilu tupàtuka pa kwamba kufika díbà citèèmà ne tusunsa makùmi àsàtù. Nènteetè bwà kulongolola cyòci aci dilòòlò edi. Mvwa. . . ndi mushintùlùke muumùke ku mayiisha àányi a cipròfetà àmvwà nyiisha mu nyungulwilu wa bitùpà bishilèshilàngànè byà ditùnga, mwalùkilè ku mayiisha à butangadiki. Nènku pa mayiisha à cipròfetà awu, tuvwa bafwànyine ànu kutùngunuka naawù ànu nàнку ànu nàнку. Kàdi mpindyewu bwà kukòsoloja, mbyenzè bu bikolè, ne bìdi bishintulula mudimu wà—wà bwambi wònsò nkòòng.

Ne cidì cìnsàka ku dyènza cyòci eci: mbwalu ditùkù kampànda, mfùmina ku Canada, ànu lwà kuulu eku mu Montana emu, bwebwebwe dindà kampànda, Mukalenge Yesù. . . Ndi mumanyè ne bìdi byùmvwika byà bikèmesha, kàdi mvwa ngenda ngendesha kàshinyi, ki cintu kampànda kukòkaci ntèmà yànyi. Mémè kuumvwa Diyì, dijikùke ànu munùdi nuumvwa dyànyi emu, dyàmba ne: “Dìna dyèbè ndifùnda pa mukùnà wàwa.” Ki ntàngila, ne patwàkiimanà, Billy ne mémè, Mukalenge Yesù kwamba Yè ne: “Alùkilà paanyimà mpindyewu, ne ùdibwinkè mu butangadiki ànu múvwà wenza amu.”

Ki bwà cinyi ndi apa dilòòlò edi, bwalu ndi mwalùkile cyàkàbìdì ku disambidila babèèdi. Kùdi bwalu bulè pa cyòci eci, ne ndi mutwishùbwè ne nwènù beedi bàà mikàbà yà mèyi kaaba aka, bàdi batèèleja mikàbà yètù yà mèyi, nudi bamanyè cidì bwalu abu. Ndi cyàkàbìdì apa bwà kusambidila babèèdi. Kùdi mapà manènè bùngi cyanàànà mu Nzambi. Nzambi ùdi mwà kukwàta mudimu ne dyònsò dyà kùdìwu dìdìYe muswè adi bu twètù ànu mwà kuMulekela wènza nàнку. Yèyè m’Mukalenge Nzambi.

Nènku mpindyewu, ndi nteeta bwà nciikadi. . . ngèpùka kutentekela bantu byanza bu mémè mwà kucyèpuka, bwalu, mushindu awu, bìdi bimwèka bu ne (bìdi ànu mbìmpè’s), kàdi bìdi bimwèka bu ne muntù kampànda, mufwànyine kwondopiibwa, wàmba ne: “Èè, *Kampànda’s* nguvwa mumutentèkèle byanza.” Nwamònu anyi? Mémè—mémè ndi muswè kunùmòna ànu nwènù nutenteka byanza pa Yèyè, pa Kilistò.

Kiipàcilà kàányi kàdi ne, twètù bònsò tudi bamanyine ku Mifundù ne, dyondopa dyà kùdi Nzambi ndimana kupetela mwena kwitabuuja yònsò. Didi citùpà—didi citùpà cyà ku

bisaamà byà Yesù: “Yêyè wàkatàpiibwa mpùtâ bwà kushipa kwètù kwà mikenji, ku mibùndàbùndâ Yèndè twàkamana kwondopiibwa. Ànu mwàkabàndishâ Mòsâ nyòkâ wà cyamù cyâ kabanda mu cipèèlà amu, ki mwikalâ kàbìdì Mwánâ wa muntu ne cyâ kubàndishiibwa.” Kiipàcìlà kàmwèkàmwè aku.

Nènku cyòci aci cìvwa ncifwànyikijilu, Kilistò ki mubidi wà bwalu. Nènku dîbâ adi piikalâbi—piikalâbi ne difuta dyâ cibawu dyâ kale divwa difwànyine kupàtula dyondopa, ambàâyaku tung mùwâ dipyadìpyâ edi, didì ne bintu bitàmbe bwîmpè, ne cyâ kupàtula dyondopa dyâ kùdì Nzambì.

Mpindyewu, Yesù wàkabàndishiibwa bwà kiipàcìlà kàmwèkàmwè kàvwâ nyòka wa cyamù cyâ kabanda mbàndishiibwe aku (Yêyè wàkavwijiibwa mpèkaatù): bwalu, nyòka awu ùvwa mwenza wà cyamù cyâ kabanda, ne *cyamù cyâ kabanda* cìdì “cimfwànyikijilu cyâ cilumbulwidi cyâ Nzambì”; ne *nyòka*, mwikalè ùleeja “mulawu mwela nyòka” kacya ku budimi bwâ Edènâ, kwàkabwelelà mpèkaatù ne disaamâ.

Nènku Yesù kèna mwâ . . . Muntu nànsha umwe kèna mwâ kuyiisha Yesù Kilistò bu difuta dyâ cibawu kàyi ùyiisha dyondopa dyâ kùdì Nzambì to. Muntu nànsha umwe kèna mwâ kuyiisha Èvànjeeliyò kàyi ùyiisha dyondopa dyâ kùdì Nzambì to. Bwalu, nwamònu’s, kwèna . . . mmufwànyine kwikala ne . . . kabiya bikèngela bwâ kwikalayè ne bintu kampànda to. Byenzè mùdì nyama yêyè mukukwàtè, kabyèna bikèngela bwâ wèwè kumukòsa ànu dikamâ cyanànà, anyi kumukòsa dibòko dyèndè—dyèndè anyi nî ncinyi cyònsò cìdiye mukujiingile naaci to. Mushipèèlè wèwè ànu lwâ ku mutu aku nènku wâjikiji bwèndè bwalu.

Nènku ki mùshindù wàkenzâ Yesù pàakafwâYe—pàakafwâYe bwâ mpèkaatù apu: Wàkashipa byònsò bìvwàku mpèkaatù mwenzè abi, Yêyè kutùpikula mu kaabujimâ. Tudi mpindyewu munkaci mwâ kusuna di—difutu dyâ ku yètù . . . mfrangâ yâ cyeyâ cyâ disungidiibwa dyètù mu kaabujimâ ku dilwa Dyèndè dyâ cyàkàbìdì.

Pa nànkù, nudi bamòne’s, bubèèdì mbu—mbulela buludi kùdì mpèkaatù. Muntu kampànda wàkenza mpèkaatù. Kakùvwa bubèèdì to ànu too ne pàakalwâ mpèkaatù. Ne dîbâ adi pàakabwelâ mpèkaatù, bubèèdì bwàkamulonda. Bubèèdì ncyambiibwâ cyâ mpèkaatù. Nènku dîbâ adi, pàakashipâYe mpèkaatù, cyàkuumusha byambiibwâ byònsò pàmwè nendè. Nwamònu’s, cìvwa ne cyâ kwenza nànkù.

Mpindyewu, netwikalè mwâ kubala dilòòlò edi citùpâ cyâ Mufundu.

Ncyâ bushùwâ ne ndi ne disànkâ dyâ kwikala, paanyimâ pàanyi apa dilòòlò edi, ne musumbâ wànyì mwîmpè wâ bânâ bèètù bàvwâ mu disangisha mu dindâ emu, ne njandula, mmòna Mwanèètù Shakarian lwâ paanyimâ pàapa, yêyè pèndè, ne

bàábúngì bàà ku balundà bàànyì, bakwàbo kàbìdì. Ndi ne disànkà dyàbúngì dyà kwikalakù neenù kaaba aka dilòòlò edi nwênù bàná bèètù. Nùnsambìdìlaayikù mpindyewu, bu nwênù mwà kuswà.

Mpindyewu, tùbuululààyaaku mu Mifùndu, bwà kaacyena-bwalu kakesè cyanààná, bu Mukalenge mwà kwanyisha.

² Nènku nwavùlukaayi ne, maalabà dilòòlò, nénsambidilè cyàkàbìdì babèèdì. Nènku mpindyewu pàndì ngaakula... Tèèlejààyì, muntu yònsò àteetè bwà kwenza eci, kwindidi bwà cintu kampànda kwenzekaci to. Cintu cidì cikèngela bwà wèwè kwenza, nkwitabuuja Nzambi mpindyewu mene. Mwitàbùùjè mpindyewu mene! Nwamònu anyì?

³ Mpindyewu kùvwa midimu yà bwambi yà mìshindù yònsò. Nzambi, mu matùkù à ndekeelu àà, ngeela meeji ne, mmutùpèeshe byònsò bìdìYe naabì mu Mukàndà Wèndè. Byònsò bitùYe mulayè, tudì babimòne, kàdi bicidì bìmwèka ànu bu ne bantu kabèena mwà kubibàkula to. Aba bàdi balongolola bwà kubibàkula, nebàbìbàkùlè; ànu bòbò abu nkààyaabu. Cidì cìfomija umwe; citàbeeja mukwàbò mèsù.

⁴ Vùlukààyì ne, tudì twitabuuja ne Yesù Kilistò udi umwèumwè awu makèèlèlè, leelù, too ne kashidi. Yèyè kì mmufwè to, kàdi ùdi ne mwoyi bwà kashidi ne kashidi. Ne Yèyè udi kaaba aka dilòòlò edi. Tudì mu Bwikadi Bwèndè, dilòòlò edi, ne Yèyè ùdi kaaba aka bwà kushindika ne kuvwija mwìmpè mulayì kanà wònsò wùvwàYe mufilè bwà ditùkù edi awu. Ne Yèyè udi umwèumwè awu makèèlèlè, leelu, too nè kashidi. Pa nànkù, cyònsò civwàYe aci, ki cidìYe, dilòòlò edi. Pa nànkù tùMwitàbùùjèyaayi mpindyewu, patùdì tubala Dìyì Dyèndè ne twakula Bwèndè Yèyè apa, bwà tusunsa dikùmi ne tùtaanu, anyi makùmi àbìdì tùdì tùlondà etu.

⁵ Genèsè, nshapità wa 22, ku mvensà wa 7 ne wa 8, bwà mùshindù wa kupeta cyena-bwalu.

Nènku Izàkà wàkambila Abraham tàwèndè, wàmba ne: Taatù wanyì: ki awu kwambayè ne: Mmémè ewu, mwanàànyì wà balùme. Ki yèyè ne: Mònaaku mudilu ne nkùnyì, kàdi mwànà wa mùkòòkò bwà mulàmbù wà dyosha awu wèpi?

Ki Abraham kwambayè ne: Mwanàànyì wa balùme, Nzambi neàdìlongòlwèlè mwànà wa mùkòòkò bwà mulàmbù wà dyosha awu; ki kuyabò pàmwè bùbìdì bwàbò.

⁶ Mukalenge Yesù, bèneshàku Dìyì Dyèbè, swàku bwà kaDyàlùkidi kadìyì cidìdì dyenzè to, kàdi mamiinu àmatèku mu buloba bwà àpatulè lupàndù kùdì aba bàdi bàlùkèngelà, ne mu nyumà ne mu mubidi. Tudì tudìlàmbula twètù biinè Kùdì; disangisha, batèeleji, Dìyì, cyena-bwalu, dyumvwija. Nyumà

Mwîmpè àngatèku bukòòkeshi pa bumùntù bwètù, bwà tùmònè Yesù Kilistò. Amen.

⁷ Ndi muswè kwakula ànu bwà tusunsa tukesè tùdi tùlondà etu mpindyewu pa: *Njila Wa Nzambi Mulongolola Bwà Ditùkù Edì.*

⁸ Nzambi ùtu misangu yònsò ànu ne njila kampànda. Kùdi njila yìbìdì, mbwena kwamba ne, njila yètù anyì njila Yèndè. Nzambi ùdi ne njila bwà leelù ewu, bwalu Yèyè ùtu misangu yònsò ànu ùpènga njila bwà bintu byònsò. Nzambi, ku cibangidilu, ùvwa mumanyè ndekeelu, pa nàнку Yèyè mmutèèke Mufùndù Wèndè bwà cikondo ne cikondo cyònsò. Nènku cikondo aci, pàkaadìci cilwa . . . Mpindyewu kanùpangiku kumòna eci to. Cikondo aci, pàdìci cilwa, pa ciibidilu bambi mbabwelàkàne mu tusùmbu, ne bikwàbò, ne bilèlè, mu mùshindù wa ne bàdi bàshààla ntàntà wa mùliyó mujimà wa kilomèètà kule ne Dìyì.

⁹ Ne pashìishè Nzambi ùtu misangu yònsò ànu ùtùma muntu kampànda mu cyalu, mupròfetà. Nènku mupròfetà ewu . . . Nzambi kàtukù ùshintulula ndongolwelu Wèndè to. Yèyè kàtukù ùshintulula njila Yèndè to. Ùtu ùcyènza ànu mùshindù wùmwèwùmwè awu misangu yònsò. Ùtu misangu yònsò ànu ne cyà kucyènza; Ùdi ne cyà kucyènza musangu ewu. Nènku, ku cyòci eci, nkùtu Nzambi ùkwàcila mudimu ne ùshìndikila Dìyì adi. Ànu mùmvwà mwakùle neenù makèèlèlè dilòòlò awu amu, Nzambi wènza dyumvwija Dyèndè sungasunga. Nzambi kàtu ùkèngela muntu nànsha umwe bwà kuMuumvwijayè Dìyì to. Ùdi ùDyùmvwija Yèyè mwìnè, ku diDishìndika, uDìvwija dilelèlè. Nènku pàdi Nzambi wàmba ne Neènzè cintu kampànda, pashìishe Ùcyènza, kakwèna kàbìdi mpatà pa bwalu abu to. Ki mùshindù wùdiYè ùcyènza.

¹⁰ Pa nàнку Nzambi mmutùsebèèle njila. Nzambi mmunangè bânà Bèndè. Mmunangè cisàmbà Cyèndè. Mmuswè kubàkwàcisha. Mmuswè kukukwàcisha kutàmba mùdi wèwè muswè dikwàcisha. Wèwè wìkalakù ànu mwà kutèeka aci mu mwoyi wèbè amu, bwà ne Nzambi mmuswè kukukwàcisha kutàmba mùdi wèwè muswè bwà kudikwàcisha. Kàdi Yèyè ùdi ne njila, ne awu ki njila umwèpelè wakwàcilaYè mudimu nku njila Wèndè. Udi ne cyà kulwa kuupuka ku mishingà Yèndè Yèyè, kí nku mishingà yèbè wèwè to. Mishingà Yèndè Yèyè! Wèwè udi muswè kucìpetela mu mùshindù kampànda, kàdi Yèyè—Yèyè ùdi ùkupèèshilaci mu Wèndè mùshindù.

¹¹ Bu Naamànà uvwa utùkina mu màyi a—a—a Yadènè amu awu. Mòna's, wàkamba mùvwà màyi à mu ditùngà dyàbò matàmbe kutòòka ne kulengela, kàdi kí ng'aci cìvwà mupròfetà mwambè nànsha. “Dìnè emu.” Kudiinayè musangu wùmwè, nsudì miikàle ànukù; misangu yìsambòmbò, micìkàle ànukù. Bivwa bikèngela kutùmikilayè ne kulonda njila wà Nzambi.

Nènku pààkatùmikilàye mu kaabujimà njila wà Nzambi, nsudi yàkaya mwamwamwa.

¹² Nènku ndi ngàmba, dilòlò edì ne, twètù batùmikile njila mulngolola wa Nzambi, nsudi neyùmukè, bubèèdi nebuùmukè, byònsò nebyùmukè, kàdi bikèngela tulongè njila Wendè bwà ditùkù edì. Mpindyewu, kudìinà kwà mu Yadènè kí nkufwànyine kwikala ne dikwàcisha mpindyewu to; aci cìvwa mbwà Naamàna. Mikenji yìvwa mbwà—mbwà beena Yudà. Ngàsà nkùdi Kilistò.

¹³ Kàdi cikondo ne cikondo cyònsò cìdi ne cyàcì citùpà cyà Èvànjeeliyò cikàadi cimana kudyànjlila kwamba. Bible ewu ki dibuulula mu kaabujimà dyà Yesù Kilistò. Kakwèna mwà kwikala kàbìdi cyà disàkidilaKù, anyì cintu kampànda cyà dyumushilaKù to; muntu udi ucyènza mmwedìibwè mulawu. Katwèna mwà kusàkidilaKù cintu nànsha cimwè, kuumushilaKù cintu nànsha cimwè to. Tudi ne cyà kutàngila Mwômò emu bwà kumòna cìdi cilayìibwe bwà cikondo eci, ne pashìshe kucimòna cyènzeka. Awu's n'Nzambi munkaci mwà kuumvwija Dìyì Dyèndè Sungasunga. PàakambàDi ne: "Virgò neimitè difù," s'wàkiimita. Adi ki dyumvwija dyà Nzambi dyà Cyòci aci. CìdiYe ùlaya aci, ki cìdiYe wènza.

¹⁴ Mpindyewu tudi tumòna ne Nzambi kàtù ùshintulula ndongolwelu Yèndè yà dyenza maalu to. Ùdi ùbyènza misangu yònsò ànu mùshindù wùmwèwùmwe awu. Twètù tudi tushintuluka ku musangu ne ku musangu bwalu tudi ne mikàlu. Tudi twenza bilèma byà mishindù yònsò, ne tudi mwà kudyàkaja ne kulwa batàmbe bwìmpè. Kàdi Nzambi Yèyè kèna ne mikàlu to. Dyèndè dipàngadika dyà kumpàla ndipwàngàne dìbà dyònsò. Yèyè kèna mwà kulwa wa meeji matwè to. Yèyè ùvwa. . . Yèyè ki mushimì wà lungènyi lwònsò. Yèyè ki lungènyi lwònsò. Yèyè ùdi bukòlè bwònsò, wa ngulu yònsò, udi myaba yònsò, mumanyi wa byònsò, ne kàyi mikàlu. Ki bwà cinyì, pàdiYe wàmba cintu, swikilàKu musùkà wèbè, bwalu ncilelèlà.

¹⁵ Mpindyewu èkèleeziyà mikwàbò yìtu yàmba ne: "Nènku twètù kàtùtu twitabuujà *Cikampànda*, kàdi tudi twitabuujà *cikansanga*." Nzambi kàadyàkulumbulwishilàkù bàà—bàà pa buloba ku èkèleeziyà kampànda nànsha. Yèyè udi ùbalumbulwishilà kùdi Yesù Kilistò, ne Yesù ùdi Dìyì. NeÀlumbulwishilè èkèleeziyà ku Dìyì.

¹⁶ Nènku piikalabi ne *Eci ki* dibuuludiibwa dyà Yesù Kilistò bwà bikondo byònsò, ne bwà eci cikondo, Mmubuululè mu Bible ewu cìvwaYe mwà kwenza mu eci cikondo; ne patùdì tuCimona cicyènza, patùdì tuMumòna wènza cìvwaYe mulayè bwà kwenza. Ki ndilediibwa dyà kùdi virgò nànsha; aci ncyà kùkaadi bidimu binunu bìbìdi. Kàdi ncyàkalayàYe bwà kwenza leelù, cyàkambàYe ne Neènzè leelù ewu aci, ki cìdiYe leelù ewu ncyòci aci.

¹⁷ Misangu mivulè, bantu bàtu bàmba ne: “Èè, mèmè ncyèna ngiitabuuja *Cikampànda* to.” Èè, udi mupetè cyàkàbìdì mumvwiji wa Evà awu; yèyè ùdi wàngata ànu citùpà cyàDì, kàdi kí n’Dyòdì dyònsò to.

¹⁸ Pa nàнку tudi baswè kuvùluka ne Nzambì ùdi ùshààla ànu umwèumwè awu kashidi. Dìyì Dyèndè, ne cìdìYe wàmba, neÀcyènzè.

¹⁹ Cileejà ne Yèyè kàtu ùshintuluka to. Mu Genèsè 1, Wàkamba ne: “Dimiinu dyònsò divulanganè bilondèshile mùshindù wàdi. Dimiinu dyònsò divulanganè bilondèshile mùshindù wàdi.” Nènku ànu mwaba awu, tudi tulenga ànu mwaba awu mene cintu cìdì cìbyànkulà pànshì bwònsò beena ne muntu mmufùmine ku dishintuluka abu. Kanwènakù mwà kusopakajulula bintu to. Udi wangata bu mùdi kabalù ne—ne . . .mpu—mpundà, ubisopakaja pàmwè, upeta kampundu, kàdi kampundu kakèèna mwà kusangila ne kakwàbù ne kulela kakwàbò kampundu to. Bìdì bìmanyina ànu apu. “Dimiinu dyònsò mu mùshindù wàdi.” Bàdì mwà kwenza disopakaja, kàdi bìdì bìshintuluka byàlukila cyàkàbìdì, bìleeja ne kabyèna bìshintuluka bìbànda mùshindù awu to. To, mukalenge. Bìdì bìmanyina ànu apu. Udi mwà kusopakaja mbokà ne cìngà cintu, pàmwè, ne kupàtulaku shù, kàdi kwèna mwà kumusopakaja cyàkàbìdì to. To, mukalenge. Udi mwà kusopakaja ditalà dyà citùkùtukù; kàdi kùnununàaku ditalà dyà citùkùtukù adi, kwèna upeta cintu to. Bikèngela ùcisopakàjè musangu wònsò. Bwalu, Nzambì wàkamba ne: “Dimiinu dyònsò divulanganè bilondèshile mùshindù wàdi.”

²⁰ Nènku mpindyewu, ku disopakaja dyà bintu, tàngilàayi nùmonè cìdì bàà pa buloba bakabwelèmu leelù ewu. Mvwa mbala kaabwalu kampànda mwaba ewu, mu cikàndàkànda cyà *Reader’s Digest* emu, bàmba ne: “Mu bidimu makùmi àbìdì kuumukila ku mpindyewu, bakàjì kabààkùlela bânà to, byòbì bitùngùnùke nàнку. Bàdyadya byàkudyà bisopakaja”. Bwalu bùdì ne, mbacisopakàjè, ne awu kí mmùshindù wùvwà muntu mufùkiibwe to, bwà kudyà cyàkudyà cyà mùshindù awu. Cìvwa cyenjiibwe bwà kutuutakeena naaci mu . . . anyì kucidya mu mùshindù wàkafùkiibwàci awu. Kì cìdì cyèna, leelù ewu ne, kabèèna mwà kulama minyiinyi ne bintu byònsò mu mùshindù wùdìbì ewu to, mbwalu mbisopakaja, bikùnnyiibwe bitenteka, nènku, kaa, mùshindù wònsò. Bìdì ànu bisopakaja byònsò. Mbikafikè mu mùshindù wà ne bukwàbantu bwònsò nkòong munkaci mwà kubùtudiibwa ku byenzi byàbò bòbò biinè, mu kuteeta kwangata cintu cìvwà Nzambì mwenzè cìmpè, kàdi kucishintulula ne kucyèenza mu mùshindù mukwàbò, mu wàbò mùshindù wà sungasunga. Cilekèlaayi mùshindù wùvwà Nzambì mucyènzè awu!

²¹ Bàkaadi mene bakafike too ne mu mùshindù wà bàteeta kusopakaja maèkèleeziyà, leelù ewu; bùumusha ku dibàtiiza

dilelèlè dyà Nyumà Mwímpè, bàya ku dilabulangana dyà ku cyanza; ku dimyaminangana kampàndà dyà mâyi pa mutù, ku dibàtiiza dyà mu mâyi. Kaa, ekèlekèlè! Cintu mu kaabujimà's ncisopakaja. Tudi baswè kwalukila.

²² Cikùnyii bwà cisopakaja, bikèngela ùcyèngèlèkè ne ùcimyamìnè mâyi a bwanga, bwà kucilama ku twìshì ne ku bijàngàlâlà. Kàdi kî ncikùnyii bwà cishùwashùwàlè cyà bukolè to; cyôci ncikàyàbàle, cicolàkàne, twìshì katwèna tufikapù to. Cyôci cidi ne bintu bikùmbàne munda mwàci bwà kwipata kishì kule.

²³ Ne ki mùdi mwena Kilstò mushùwashùwàlè nàнку! Kabyèna bikèngela bwà wèwè kumwengeleka ne kumutuuta cyanza pa makaaya, ne kumwambila *cikampànda*, *cikansanga*, anyi *cikankènga* to. Yèyè ùdi ne cintu kampànda munda mwèndè, dibàtiiza dyà Nyumà Mwímpè, didi diipata bikwàbò byònsò kule naaci. Kabyèna bikèngela bwà kumusèngeleela to, bwalu yèyè ncikùnyii bwà cyà ku cifùkilu cyà Nzambì. Yèyè ùdi ne cintu kampànda munda mwèndè cidi cilwangana mvità. Mwena Kilstò ùtu ùlwangana mvità bwà kaacentimètre kònsò kàà buloba bùdiye mwimànyine aku. Yèyè ùdi ne cyà kwenza nàнку, piikalàyekù ùtèkemena bwà kwikalayè ne mwoyi. Nèнку, mu dicyenza, kùdi Cintu kampànda munda mwèndè amu cidi cimukùba.

²⁴ Evà wàkateeta bwà kusopakaja Dìyi, ku cibangidilu. Nzambì ùvwa mumwambile ne: “Ditùkù dinwàkùdyà, ditùkù adi ndinwàfwà.” Kuteetayè bwà kuDisopakaja ne dimanya dyàkamupèeshà Sàtaanà adi. Kàdi pààkenzàye nàнку, s'ùjimijile bukwàbantu bwònsò nkòong, ànu mwaba awu, mubùfile kùdi dyabùlù, pààkateetàye bwà kusambakaja ne dimanya Dìyi dyà Nzambì didi kadìyi disambakaja adi.

²⁵ Kacyèna cifùmina ku dimanya dyà Dìyi to, cidi cilwa ku bukolè bwà Nyumà Mwímpè! “Kî nku bukolè, ku ngulu to, kàdi nku Nyumà Wanyì,” mùdi Mukalenge wàmba. Mùshindù awu ngùdi Nzambì ùcyènzà. Dìyi dyà Nzambì n'Dimiinu dyà Mwoyi wà Cyendèlèlè.

²⁶ Wèwè utteeta kuDisopakaja, ciwènzà ncinyi? Neùdishebèye wèwè mwinè naaDi. KaDyàkukùmbanakù to. KaDyàkubwelakanakù to ànu mùdi mâyi ne màfutà kabiyi mwà kubwelakana amu. KaDyàkubwelakanakù to.

²⁷ Kabàtukù, mu mishindù yònsò, mbatèete bwà kupeta cintu nànsha cimwè cidi citàmbe mùshindù wà Nzambì wà dicyènzà bwímpè to. Nudi bamanyè's, kacya kabàtukù bapetè mùshindù kampànda, mutàmbe bwímpè, bwà kazòlo kuledibwakù pa buloba apa, kutàmba wà kudipàtukila mu cizubu cyàkù aci ne dituuta dyà mwìnù to. Nuvwakù bamanyè cyôci aci anyi? Kacya kabàtukù banjì kupeta mùshindù mutàmbe bwímpè to. Kakwàci kwètù kakesè aku nkaledii bwe ne kaadyùlu kakesè

ku ndekeelu kwà—ku ndekeelu kwà mwínù wàkù aku. Nènku kaamwínù kakesè kàdiku naakù aku, mbwà kuya kakwàta mudimu ne kukoonya, kukoonya kumpàlà ne paanyimà, too ne pàdiku kàtwàdija kupàtula mutù wàkù, kàpàtula mutù wàkù awu pambèlu, kàshiya njila wàkù bwàshi. Ki mùshindù mulongolola wa Nzambi. Wèwè mukàkòke mukàpàtùle mu cizubu amu, s’neùkàfwishishè. Kakààkwikala ne mwoyi wèwè mukàkòke mukàpàtùle mu cizubu amu to. Bikèngela kàlwilè mu njila wa Nzambi.

²⁸ Ki lutàtu ludi naalù beena Kilistò leelù ewu ndwòlò alu. Tudi babàlaabidile bikolè, ne balabuùlàngàne naabò ku byanza ne babàbwejè mu musokoko, ne babàshiye bàà mu èkèleeziyà. Cìdì cibàkengela ndisambila dyà cyena-kale dyà ku cyoshelu kùdìbo bàsambila bàsambidilamù, too ne pàdìbo bàdilwila, bàbwela mu njila mulongolola wa Nzambi, too ne pàdìbo bàdisuùlula bóbò biinè ku maalu a pa buloba. Lutàtù lùdiku, leelù ewu ndwà ne, bàdi bàfundisha dìnà mu mukàndà ne bàdishìya bàà mu èkèleeziyà, ki cyònsò cidìku ncyaci. Kàdi njila wa Nzambi, njila mulongolola awu, nkushààla mwaba awu ne kuyooba kumana, too ne pàdì Nzambi ùkupèsha Dilediibwa dipyadipyà. Ncyà bushàwà menemene. Kumupàtulamù, necìmushebèyè.

²⁹ Ki bwalu mbwabù, leelù ewu, kùdì bantu. Dilediibwa dipyadipyà, bàdi bàdyèpela. Kì mbadiswè to. Kaa, mbapingàje cintu kampànda pa mwaba wà Dilediibwa dipyadipyà adì ne: “lwàyi nwítabuujè, ki cyònsò cidì cikèngelà bwà nwènzè.” Dyabùlù’s ùtu wítabuujà, yèyè mwìnè awu, kàdi nwènú’s nudi bamanyè ne kì mmulediibwe cyàkàbìdì. Kùdì Dilediibwa dipyadipyà. Kùdì cintu kampànda cidì cidìfila, mbyenzè bu ne kì mbikùmbànàngàne to, kabiyi bikùmbanangana ne lulabulu lwà bàà pa buloba to.

³⁰ Dilediibwa kanà dyònsò edi ditu ànu mbukooyà. Nànsha dyenzèkèle penyì. Diikalè dyenzèkèle mu cikùmbi cyà ngulube, anyì—anyì mu lùpitaadi. Dilediibwa ditu ànu mbukooyà.

³¹ Ki mùdì kàbìdì Dilediibwa dipyadipyà! Nedikwenzèjè bintu byúvwà kùyìkù mufwànyìne kwela meeji ne uvwà mufwànyìne kwenda to. Nedikufikishè ku ditwà binù ku cyoshelu ne dikudidisha mwadi, ku dikwelesha mikunda, ku dikùpula bilaabu kwìsù kwèbè, ku dikwelesha byanza muulu, ku ditumbisha Nzambi, ku dyakula dyà mu myakulu, ne bintu byà mishindù yònsò. Dilediibwa dipyadipyà nedyenzè nànkù bwalu nnjila mulongolola wa Nzambi bwà kulediibwa cyàkàbìdì.

³² Bikèngela ùfwe. Bikèngela ùfwe kumpàlà kwà wèwè kulediibwa cyàkàbìdì. Dimiinu kanà dyònsò edi didì ne cyà kufwà kumpàlà kwà kufuùlulukadi. Dyòdì kadiyi difwè to, didì dishààla nkààyaadi. Bikèngela muntu àfwe ku ngeelèlù wendè yèyè mwine wa meeji. Bikèngela àfwe ku ngeelèlù wa meeji wa ku cintu kanà cyònsò pa kuumusha Dìyi dyà Nzambi, ne

àlwe mu njila Wendè. Ki cyalu cyà Nzambì ncyaci. Katwèna tutwilangana Nendè mu meeji ètù to; tudi tutwilangana Nendè pa cìdiYe Yèyè mwambè bwà kwenza. Ki njila mulongolola wa Nzambì bwà cyòci nyawù. Bantu bàdi bacyèpuka; kî mbaciswè to. Kàdi ncilelèlè, nànsha nanku. Neciikalè, cìdi cilela lufù, ne bikèngela ùfwe, ùfwe ku ngeelèlù webè wa meeji.

³³ “Èè, ndi mumanyè ne Bible ùdi ùcyàmba, kàdi mémè ncyèna mwà kucyumvwa to.” Dìbà adi shààla mwaba awu too ne pàdi Nzambì ùcìbuulula. Ncyà bushùwà. Cìdi ne . . . Ki Dilediibwa dipyadìpyà ndyòdi adi.

³⁴ Mabata ne byokòsò, kabàtu bânji kupeta mùshindù mutàmbe bwìmpè bwà kuyabi ku Sud, kutàmba wà kukùngwila dyàmbedi to. Ne aci ncyà bushùwà. Neùbimònè bìdikùngwija byònsò pàmwè ne bìdilwila nkààyaabì, disàkiibwa dyà mùshindù kampànda dibikòka pàmwè, nènku bìdikùngwija mu cisumbu kumpalà kwà kubùukabì, kumpalà kwà kuyabi ku Sud. Ncinyi aci? Ncikondo cyà ditàbuluja, pàdìbi bìdisangisha byònsò pàmwè apu. Ukààdikù muumvwè mutooyi wà nànkù kacya bàakulela, bu kuumvwa pàdi byokòsò abi bidisanga, anyi mabata awu anyi? Kacya ncitukù mwanji kuumvwa wà nànkù to! Ne àdi ne . . . Kakwèna mukwàbò, mùshindù mutàmbe bwìmpè bwà òwò kucyènta to.

³⁵ Misangu yàbùngì, lwà mu meetu à ku nord kwàka, ntu mbandila mbandila wa nzànzànzà wà muvù wà mashika, mu Canada. Musumbà wà mabata malela ànu mu dyòdi dijiba adi, kaàyikù kacya muumùke mu dijiba adi to, kakwàcìkwètù aka kakàyikù kuumùkemù to. Kàdi katanci aka, kaalupeepèlè katalàle kupwekakù kàfùmina ku Nord. Kaadibata kakesè kalùme, kakesè kàà kale aka, nkalela ànu bwà kwikalakù kalombodi, kàjuukila ànu munkaci mwà dijiba adi, kàtadika kaamwìnu kàakù kakesè aku muulu, kènza hoo-hoo misangu yinaayi anyi yitaanu, ne dibata dyònsò didi mu dijiba amu dilwa buludi kùdiku aku. Nènku kàjuukila mwaba awu, kàya buludi katàngile ku Louisiane ne mwàkù mwònsò, too ne ku madimi à loosà aku.

³⁶ Bwà cinyi? Kacya kabàtukù bakàpetèlè mùshindù mutàmbe bwìmpè wà kufikakù kuntwaku to. Kwèna mwà kuyisaka pàmwè to. Wèwè muyèlè mu cipangu ne . . . mu musàsà, ne muya naayi kuntwaku myela mu màshinyi a cisemuna. Dibata adi didi ne cyumvwilu cìmpè kutàmba aci. Nènku wèwè mudyèlè mu musàsà awu, bwà kuya naadi kuntwaku, ndimanyè ne bàyaaya naadi ku cishipeelu. Ncyà bushùwà menemene. Dyòdi didi diyayayakù mu mùshindù mulongolola kùdi Nzambì.

³⁷ Mùshindù awu ngùdi wùkèngela bwà muntu kwenzayè leelù ewu, kî nkusakiibwa mu musàsà kampànda wà cyena-màngumba nànsha. Kàdi kubwela mu mùshindù wùdi Nzambì mwambè bwà kubwela, ku dibàtiiza dyà Nyumà Mwìmpè ne

Dilediibwa dipyadiyà, ditàbuluja dyà bantu bàlwa mbimbimbi. Kaciyi dikashààlà dyà wa mu èkèleeziyà, dyà bàsengeleelangana kumbèlù ne kumbèlù, ne dyabanyinangana dyà bibèjibeji to; kàdi Dilediibwa, kulediibwa cyàkàbìdì, muujiibwe tètè ne Nyumà Mwimpè, njila wa Nzambì, kudisùulula ku maalu a pa buloba. Cyà bushùwà! Kwitabuuja Dìyi dyà Nzambì! Dìbà dyàkùmbanyi. Ki citùdì ne cyà kwitabuuja ncyôci aci.

³⁸ Muntu, kwênàku mwà. . . bantu nànsha bôbò búngì bishi bàdì bafwànyine kuteeta bwà kuya ku dijiba dyà mabata adi kuntwaku kwamba ne: “Mpindyewu anji indilaayi kakesè, nwènù tuumabata tukesè etu, ndi ne bwalu bwà kunwàmbila. Tudi ne dibata dilongè kàlaasà mwab’ewu. Didi ne dipòlomè dyà Ph.D. ne dyà LL.D. Ndi nzwàmbila, dyôdì didi mwà kunùlombola.”

³⁹ Mabata awu’s àdi ne cyumvwilu citàmbe aci ku bwimpè. Èyowà’s, mukalenge. Wôwò kaèna àcyùka byà tùlaasà tulonga tutàmbe bwimpè abi to, cyônsò cidiku aci. Mmàmanye mpungi kampànda udidì dyèla. Ndisàkiibwa kampànda. Kaa, ekèlekèle! S’bivwa bikèngela bwà èkèleeziyà kumanyayè Dìyi dyà Nzambì mùshindù awu!

⁴⁰ Cidi ndiyi kampànda dilubidile. Bible mmwambè, Pòlò mmwambè ne: “Piikala mpungi ùpàtula mwadi mulubidile, udi mwà kudilongolola ku mvità nganyi?” Ncyà bushùwà, èkèleeziyà yèyè—èkèleeziyà yèyè ùpàtula dìyi dilubidile dyà “diya kashààla wa mwòmù.”

⁴¹ Nzambì mmwambè ne: “Dilediibwa!” Cyàkenzà Dilediibwa musangu awu aci, Dilediibwa didi dyènza cintu cimwècimwè aci leelù ewu, bwalu Yesù Kilistò ùdi umwèumwè awu makèèlèlè, leelù, too ne kashidi. CìvwàYe musangu awu aci, ki cidìYe leelù ewu. Cyàkenzàbo musangu awu aci, ncintu cimwècimwè citùdì twètù twenza leelù ewu eci. Mùshindù wàkaCìpetàbo musangu awu, ncintu cimwècimwè aci cidìbo bènza leelù ewu. Cintu cimwècimwè aci cidìbo naaci leelù ewu, ki cìvwàbo naaci kale wàwa. Cyôci ànu cilwè, Cidi cìlwa mùshindù awu. Ki njila nyèyè awu, njila mulongolola wa Nzambì. Kàtu ùshintulukakù to.

⁴² Mabata kaàtu àshintulukakù to. Àtu àdikùngwija ônsò nkòong, ku cidimu cyônsò, àya ku nord, ku sud, ne mùshindù wònsò wùyaayàwu awu. Àtu ànji àdikùngwija dyàmbedi.

⁴³ Mùshindù awu ki wùdì Nzambì wènza. Ùtu ùtùma Dìyi Dyèndè ku movù, mu movù awu, dìbà adi Didi dìmwèneshiibwa. Nènku nànsha maalu makwàbò búngì kaayi ènzèka; pàdìbo bà mòna Dìyi dyà Nzambì dilaya bwà ditùkù adi, diikàle dishindikìibwe ne dilayiibwè, kakwèna cintu nànsha cimwè cyàbìimanyikà to. “Virgò neimìtè difù.” Nènku pàakambàbo. . .

⁴⁴ “Mukalenge Nzambì wetù neàjuulè Mupròfetà mufwànàngàne naanyi,” mwàkambà Mòsà.

⁴⁵ Nènkù pààkamònàbo Muntu ewu ùlwa wènza bintu byàkenzàYe abi, bààkamanya ne ùvwa m'Maasiyà awu. Pààkamònà Filìpò aci cyènzeka, wàkamba ne: “Wèwè udi Kilistò. Udi Mfùmù wa Izalèèlà.” Wàkacimanya bwalu Dìyì òvwa dicilayè, ne cìvwa ne mwoyi mu ditùkù adi. Nànsha byòbì ne Bafaalèsà, Basadokà búngì munyì bàvwa biimàne mwaba awu, Balongeshi bapilùke mu Bunzambì, kabyàkamwimanyikakù to nànsha kakesè, bwalu yèyè ùvwa wènda ùkèbangana ne cimanyinu aci. Pààkacimònàye cyènjiibwa, ki cìvwa cimanyinu cyà díbà adi ncyòcì aci. Ki cìvwaò bóbò bindile, njila mulongolola wa Nzambì. Èyowà's, mukalenge.

⁴⁶ Mpindyewu, kwèna mufwànyìne kupèèsh dibata dilonga dyà kàlaasà to. Kí ndifwànyìne kulonga to. Kí ndifwànyìne kucìjìnga to. Makwàbò mabata kí mmawànyìne kudilonda to, nànsha dyòdì dyambè ne didi ne màpòlomè búngì munyì. “Mpindyewu, tàngilàayi kùneeku, mèmè ndi muyè ku cilongelu cyà mabata. Ndi mumanyè byònsò bìdiku. Ndi mupeyè dipòlomè. Ndi mumanyè bintu byònsò ebi.” Kacyèna ne dikwàcisha to nàsha dikesè. Nànsha dimwè dyà ku mabata makwàbò awu kí ndifwànyìne kudilonda to, pìikalàwu mabata mashùwashùwàlè, amen, bwalu òwò mmindile cimanyinu kampànda. Pàdìwu àmòna cimanyinu aci, àdi àcìitabuujà.

⁴⁷ Nènkù pìikalàbì ne dibata didi ne mùshindù wà dicimanya, kàdì twàmbè bìshi bwà mwena Kilistò mulediibwe cyàkàbìdì? Bìvwa bikèngela bwà twètù kumanya Yesù Kilistò mu bukòlè bwà dibìikà Dyèndè dyà ku lufù. Cyà bushùwà's. Nzambì ùdi ucyènza bilondèshile mùshindùù mulongolola wà Nzambì.

⁴⁸ Vùlukàayi ne, dilonga dyà tulaasà kí ndifwànyìne kwikala cyamù cyà mudimu bwà kuàlombola ku mwaba mulongolola wà Nzambì to. Cyamù cyà mudimu cìdìwu naaci ndisàkiibwa. Nènkù òwò, mabata awu, mmamanyè ne disàkiibwa adi ndyàbàfikishà ku mwaba mulongolola wà Nzambì.

⁴⁹ Ki mùdì kàbìdì Nyumà Mwìmpè ùya ne Èkèleeziyà ku mwaba mulongolola wà Nzambì. Ki nkukadivwija wa mu èkèleeziyà kampànda to, kàdì nkuijìbwa tètè ne Bwikadi Bwèndè, bwà kumòna Dìyì Dyèndè dimwènèshìibwe, dishìndìkiibwe. Ki njila mulongolola wà Nzambì bwà èkèleeziyà nyèyè awu, misangu yònsò, bwà bantu, bwà kubàfikisha ku mwaba wùdì Nzambì mubàlongòlwèle. Ki cìvwa menemene cìkèngela bwà èkèleeziyà kwikalayè leelù ewu. Mpindyewu, tudì bamanyè aci ncilelèlà.

⁵⁰ Kakwènakù mùshindù mutàmbe bwìmpè bwà...Kacya kabàtukù banjì kupeta mùshindù mwìmpè bwà mwànà wa mu dibòkò kupetayè cìdìye ùjìnga kutàmbe kudila mwadi to. Wèwè mumupèèshè kangonga, wamba ne: “Junior, wèwè nyawù ucìdì ànu ne matùkù asàtù cyanàànà, kàdì mpindyewu paùdì muswè,

wêwè ujinga bibèrò byèbè, bândisha kangonga aka ùkàdidishè,” umonèbi ní byàkùmbana. Kabyàkukùmbanakù to. Mwànà wa mu dibòkò ùdi ùdila bwà cìdiye ùjinga aci. Ki njila mulongolola kùdi Nzambì nyéyè awu. Paùdi utàmba kwela mbilà. . . Kwèdi kakwàcìkwètù aku mfimbù to, kàdi kòkò kàlonda ànu njila mulongolola kùdi Nzambì. Yéyè mmuswè cintu kampànda. Aci ncyà bushùwà. Ki mùshindù ùmwèpelè ùdiyè mumanyè bwà kubiikidilayè mamwëndè; kucyèlela mbilà mikolè, kucididila mwadi. Ncyà bushùwà.

⁵¹ Ki cidi Nzambì ùtùmina bânà Bèndè díyi. Ki cidi Nzambì ùtùmina bânà Bèndè beena kwitabuuya díyi. NcidiYe mwenzè. Kí mmiyiiki yà mamanya à mu mitù to, kí ntèlòjì kampànda munène, tèdòlòji wa dilongeshangana to. Yéyè mmuswè bwà wêwè wèlè mbilà bwà bìdi bikukèngela. Nènkù aci ncyà bushùwà, kubyèlela mbilà! Wêwè mutàmbe kutàndabala ne muumàkàne, kwàdyàkucipetakù to. Wêwè mudilongòlòle bwà kuteketanganakù ndambù, ne kudila mwadi, Nzambì neàkupèèshèci. Yéyè ùtu muswè kuumvwa bânà Bèndè bàdila myadi. Elà mbilà kùdi Nzambì bwà bìdi bikukèngela! Ki cidi Nzambì muswè. Ki njila Wèndè mulongolola nyéyè awu. Ùbididile bikolè! Ki mùshindù wùdi mwànà wa mu dibòkò ùdila; ki mùshindù wùdiYe muswè bwà wêwè kudila.

“Kudila bikolè too ne díbà kaayi?”

⁵² Mwànà ùtu wela mbilà too ne díbà kaayi? S’ntoo ne pàdiye ùsànkishiibwa. Nènkù mùshindù awu ngùvwà wukèngela bwà mwena Kilistò mulelèlè kwenzayè, mwànà wa Nzambì. Wêwè mumòne ne Nzambì mmufile mulayi, kuwùlekèdi to, elà mbilà too ne pàdiwu wàdamunyiibwa. Elà mbilà too ne paùdi umòna Nzambì ùshindikà Díyi Dyèndè. Pàdi Nzambì ùshindikà Díyi Dyèndè, ne ùjaadika ne dikaadikù, díbà adi kabyèna bikèngela bwà wêwè kwela kàbìdi mbilà to; wacìpecì, asà lwendu ùye wenda uMusàkidila bwà bwalu abu. Pawùdi kùyi mwanjì kwenza aci to, elà mbilà mikolè too ne paùdi ucìpeta. Mèmè ntu munangè aci, nnànkùkila, kacya ànu ngààkwata.

⁵³ Kí ncikùnyiiwbà cisopakaja to, kí ncyà cikèngela kwengeleka ne kulaaba cyanza, ne kwenda naaci cyambula to. Beena Kilistò mbintu bilelèlè, bishuwashùwàlè, bilela, byà Nzambì. Bàdi bàlwangana mvità bwà kaaba kààbò, ne bàlwangana too ne pààjikà bwalu bwàbò pa buloba ebu. Muswakeenu wàci wònsò wùdi mmvità.

⁵⁴ Nzambì wàkambila Mòsà ne Wàkamupèèsha buloba abu. Wàkambila Yoshùwà ne: “Mwaba wònsò wùdi dikàsà, anyì cidyacilu cyà dikàsà dyèbè, cidyata, gààkùpèèshiwù.” Bivwa bikèngela bwà kulwanganabò bwà katùpà kònsò kààci. Twètù kàbìdi tudi tulwangana bwà katùpà kònsò kààci. Kí ncintu cyà bikèngela kwengeleka ne kulaaba cyanza to, ne kwenda naaci mùshindù awu, kwamba ne: “Èè, nényè neebè kuntwaku,

tùmonèbi cyûdi wela meeji bwà bwalu abu aci. Ûfilè webè mmwènenenu.” Awu kí mmùshindù wà kulwa nànsha.

⁵⁵ Lwâ ne dikàngà dyà mwoyi. Lwâ wamba ne neùshaalèku too ne pààjikàku. Shààlakù too ne pàdi Nzambi wàndamuna ne ùshindika. Muntu udi witabuuja Nzambi, ùdi mwà kumòna Bwikadi bwà Nzambi, kuumvwa Bwikadi bwà Nzambi, kulengela Bwikadi bwà Nzambi, ne kumanya ne Ûdipù. Yèyè ùdi kaaba aka bwà kwandamuna cintu cyònsò cyàkafidilàYe mulayi bwà ditùkù edi. Dìbà adi, elà mbilà too ne paùdi ucipeta! Shààla kacya ànu wàMupya. Kùumukukù to, nànsha byòbi bikèngela bwà wèwè kushààla muunya ne bufùkù. Nzambi kí mmuswè bwà Bèndè bânà kutèèlejábò miyiiki yà mamanya à mu mitù to. Mmuswè bwà kuCyèlelabò mbilà, too ne pàashindikiibwà mulayi.

⁵⁶ Abraham kaaba aka ùvwà ùkèngela mulàmbù. Cyàkenzekà ncinyi? Nzambi wàkamulongolwela mwànà wa mùkòòkò. Ki njila uvwa mulongolola wa Nzambi nyèyè awu. Ûvwa ùkèngela mulàmbù, ki Nzambi kuwùlongololaYè Paanyimà, kubìikilayè mwaba awu ne *Yèhowàh-Yilè*, “Mukalenge neàlongololè Yèyè mwinè mulàmbù.”

⁵⁷ Mpindyewu, Yobò, musangu kampànda, mupròfetà wa kale awu, Yobò. Ûvwa mupròfetà. Wàkapeta lutàtù. Sàtaanà ùvwa mujingè kumuteeta, ki kumutwàye byùjà. Ki kwangatayè bânà bèndè, kwangatayè bimunà byèndè, kwangatayè byònsò bìvwàye naabi, ne kumutwàye byùjà.

⁵⁸ Dyà bèndè bamusàmbi bàlwa, bààkenza cinyi? Cyàbò cyà kutwàla civwa ànu didyombola, kumutàcishabò, bàmwambila ne: “Mòna’s, wèwè’s udi mwenzè mpèkaatù, mu musokoko.”

⁵⁹ Ki Yobò kushààla ànu kacya wàkwàta. Ûvwa wèla mbilà mikolè. Ûvwa mutwishiiibwe ne ùvwa ùlonda mèyi matùmà à Nzambi. Ûvwa mwenzè ànu menemene civwà Nzambi mulayè bwà kwenza. Civwà Nzambi mumulayè aci, bwà ne Yèyè ùvwa mwà kwimana ku luseke lwèndè, mwinshì mwà mulàmbù wà dyosha awu, ne kushààlayèpu.

⁶⁰ Pa nàнку, Nzambi wàkamupetsha cikèèna-kumòna. Yèyè ùvwa mupròfetà. Wàkamòna cinyi? Wàkamòna Dîyi, Yesù Kilstò. Kwambayè ne: “Ndi mumanyè ne Mupikudi wanyì ùdi ne mwoyi. Ne ku matùkù à ndekeelu, Yèyè neimanè pa buloba. Nànsha misàndà yà mu dikobà mibùtùle mubidi ewu, kàdi nànsha nàнку mu mubidi wanyì mèmè nèmmonè Nzambi.” Nwamònu’s, Yèyè wàkamupetsha cikèèna-kumòna cyà dibìikà dyà ku lufù aci. Bu mùvwàye mupròfetà, wàkamòna Dîyi. Wàkamòna Dîyi ne kumanyayè ne mifùbà yèndè ne mubidi wèndè nebìjuukè cyàkàbìdì mu ditùkù dyà ndekeelu. Bààkamukonka yèyè ní ùvwa mumanyè mwaba wùvwà Nzambi, ní ùvwakù ànu mwà kumòna.

61 Kwambayè ne: “Cilòngò cidi cifwa, cidi cijjuuka cyàkàbìdì; mucì wùdì wùpuka, wùdì wùjuuka cyàkàbìdì; kàdì muntu yèyè ùdì ùlààla panshì ne ùkùùla mwoyi, ùdì ùnyanunuka, ùdì penyì? Éyì bu Wèwè kunsokokakù mu lukità, ne kundamakù mu mwaba musokòme too ne pààpità ciji Cyèbè cicolè aci.”

62 Ki mikungulu kubangayì kukungula, mikenyi kubangayì kupenya, Nyumà wa Mukalenge kwikilaYè muprofeta awu. Ki kujuukilayè kuulu, ne kumònayè Dilwa dyà Mukalenge, ne kwelayè lubilà lukolè ne: “Ndi mumanyè ne Mupikudi wanyì ùdì ne mwoyi, ne ku matùkù a ndekeelu Yèyè neimanè pa buloba. Nànsha misànda yà mu dikòbà mibùtùle mubidi ewu, mu mubidi wànyì mèmè nèmmonè Nzambi.” Nzambi wàkamupetesha Dìyì, Yesù Kilistò, ki kuMumònayè ne kuMubiìkilayè ne m’Mupikudi Wendè.

63 Izalèlèlè ùvwa dijinga ne njila wa dipàtukila mu Èjiipitù, ki Nzambi kubàpetesha mupròfetà, mupròfetà wàkashindika Dìyì òvwa dilayìbwe kùdì Abraham. Menemene, njila mulongolola wa Nzambi’s! Kabàvwa mwà kulongesha mùsàlaayi kampànda to, kabàvwa mwà kwenza *cikampànda*, kabàvwa mwà kwenza *cikansanga* to. Cintu cìmwèpelè cyàkenzàbo cìvwa nkwindila njila mulongolola wa Nzambi. Ki kwamba Yè, wàmba ne: “Ùvwa mwà kupàtula bantu abu, paanyimà pàà bidimu nkàmà yìnaayi. Cisàmbà cyèndè cìvwa mwà kusanganyìbwe mu bupika, kadi Yèyè ùvwa mwà kubàpàtula ne cyanza cicolè. Ùvwa mwà kuleeja bimanyinu Byèndè ne maalù à kukèma, ne kupeta butùmbi mu ditùnga adi.”

64 Kì muntu awu udi upweka ewu, pààkadilàbo bikolè apu’s! Kàdì mpindyewu vùlukàayi ne, myadi yònsò ayi kayìvwa mwà kubàsungìlakù to, too ne pààkakùmbanà dìbà adi.

65 Bintu bitùdì tumòna leelù ewu ebi, kabivwaku mwà kwenzeka kùkaadi bidimu makumi àbìdì, anyi kùkaadi bidimu makumi ànaayi to. Ndeelù ewu udici cyènzèka. Ki dìbà ndyòdì edi’s! Ki cikondo ncyòci eci! Mpindyewu ngudi cikondo cidici cyùle. Bwà cinyì? Nzambi ngudi mucìlayè, kadi’s ki cyòci eci.

66 Bààkamba, kùkaadi bidimu lukàmà, ne: “Dibàtiiza dyà Nyumà Mwìmpè kadìvwa mwà kwikalaku cyàkàbìdì to.” Bààkamba, kùkaadi bidimu makùmi àtaanu ne: “Nyumà Mwìmpè. . .” Kàdì nwènù beena Mpenta’s nwàkabàjaadikila ne, cìvwa ndìbà dyà Nzambi bwà kupòngolola Nyumà Mwìmpè. Cìvwa ba-Méthodistes, ba-Baptistes, ba-Présbytériens, ba-Luthériens bambè nànsha ciikàle cinyì, nwènù’s nwàkashàala ànu ne Dìyì dyà Nzambi. Bantu bàà bukìtù bààkapàtuka kuntwaku ne kushàalabò ànu kacya bààkwàta too ne mwàkalwa dibàtiiza dyà Nyumà Mwìmpè, ne bààkaakula mu myakulu ne kutùmbisha Nzambi. Muntu nànsha umwe kèna mwà kunwàmbila bishìilangane to. Nzambi mmudyùmvwijidi wa Yèyè mwinè; nwacìpeci. Udi mufwànyìne kwikala kùyì mwà

kucyùmvwija to, kàdi udi mumanyè ne udi naaci. Nganyi udi mwà kuumvwija Nzambi? Muntu nànsha umwe.

⁶⁷ Ncyèna mwà kukwambila mùdì Nzambi mwà kuleeja cìkèèná-kumòna to, kàdi ndi mumanyè ne cidi cyènzeka. Ncyèna mwà kuumvwa mùdì Nzambi mwà kwenza bintu ebi to. Kí mbwalu bwànyì bwà kucyùmvwija to. Yèyè ùdi, mmusòmbè nkààyèndè. Yèyè ùdi Elohim, Ewu udi udikùmbana nkààyèndè. Mémè ndi ànu musadidi Wèndè cyanààná. Ndi mumanyè ne m'Mucilayè, ne ndi mumanyè ne ncyôci eci kaaba aka. Ki cintu cìmwèpelè cìndì mumanyè ncyôci aci. Ndi mumanyè aci ne, Yèyè ùdi umwèumwè awu makèèlèlè, leelù, too ne kashidi. Ndi mumanyè ne m'Mulayè cyôci eci, ne Nzambi ùdi mwab'ewu bwà kuvwija mulayi Wèndè ne mmulelèlè. Èyowà. Njila mulongolola wa Nzambi's!

⁶⁸ Izalèlèlè bàakamupetsha mupròfetà, wàkashìndika Dìyì awu, ki kubàpàtulabò. Mupròfetà ewu, Mòsà, wàkasòmbela mu cipèèla bidimu mulongolongo, bidimu makùmi ànaayi, ùlwàngana ne bantu aba, ùteeta bwà kubàlama too ne pàvwàye mwà kubàfikisha ku buloba bulaya. Kufikabì mu mùshindù wà ne, muntu awu ùvwa ne cyà kufwa; ùkaavwa ne bidimu lukàma ne makùmi àbidi. Kakùvwa kaaba kàà kufwilayè to. Pàakafikàye pabwìpì ne kufwà, Nzambi wàkamulongolwela Lubwebwe kampànda; Lubwebwe lùvwàye mutuutè mu cipèèlè alu, Lubwebwe lwàkabàlondà alu, kwàkanwinàbò máyi aku. Nzambi wàkamulongolwela Lubwebwe kampànda, mwaba wà kufwilayè, wùvwa Mòsà mwà kufwila lufù lwà kaneemu.

⁶⁹ Pa lwòlò Lubwebwe elu, Nzambi, ndekèlè mfwilèku pa Lubwebwe lumwèlumwè alu! Ki pàndì muswè kufwila. Lubwebwe alu lùvwa n'Kilistò Yesù. Èyowà's, mukalenga.

⁷⁰ Paanyimà pàà yèyè mumanè kufwila pa Lubwebwe alu, wàkakèngela bambudi bàà mushèètè wà bafwè. Ki Nzambi kumutùmina musùmbà wà Banjèlo. Bwà cinyì kí mmutùme musùmbà wà bakùlù bèndè? Bwalu muntu nànsha umwe kàvwakù mwà kumufikisha mwaba wùvwàye ùya awu to, ànu Banjèlo. Bàakamwambula too ne mu Bwikadi bwà Nzambi, yèyè ùvwa ùkèngela bambudi bàà mushèètè wà bafwè nènku Nzambi kucìlongolola. Wàkaya mùshindù mulongolola wà Nzambi. Àlèluuyàh's wè!

⁷¹ Henòkà ùkaavwa mwèndè bidimu nkàmà yìtaanu ne Nzambi, ne wàkaMusànkisha. Byàkamukèngela cibeeba cyà kwalukidilayè Kumbèlu. Nzambi kumupeteshaci.

⁷² Eliyà ùvwa mwelè Izabèlè mulawu bwà kwìsù kwèndè kulaaba bilaabu aku, ne mùshindù wèndè wùvwàye mufikishe bantu bònso ku dýenza maalu awu. Nènku ùkaavwa mucyòke ne muzèngè, ne ùkaavwa pabwìpì ne kwalukila Kumbèlu. Ùkaavwa mukùlákàji be mu mùshindù wà kàciyi mwà kwenda kusabuka Yadènè to; Nzambi kumulongolwelaYe njila wa

kusabukaye Yadènè. Ûvwa ùjinga kubànda mu Dyulu, bwà katuutakeenayè ne Nzambì; Nzambì kutumaYè dikalù dyà mvità dyà kapyà, ne tubalù, e kumwambula. Njila mulongolola wa Nzambì. Njila mulongolola wa Nzambì. Ki citùYe wènza misangu yònsò menemene. Cyà bushùwà. Èyowà's, mukalenga. Nzambì ùtu ulongolola njila, misangu yònsò. Eyowà.

⁷³ Beena meeji, pàvwàbo mu njila bàfùmina ku Babùlòna kwàka, bàvwa munkaci mwà kumòna njila uvwabò baswè kupweka nèndè, bwalu bàvwa bamanyè ne bìvwa bikèngela bwà Mfùmù ewu àlediibwè. Bàvwa dijinga ne kaleeji-nord; Nzambì kulongololaYè Mùtootò. Bààkashiya bintu bikwàbò byònsò paanyimà. Kabàvwa dijinga ne tuleeji-nord to; bààkalonda Mùtootò awu. Ûvwa nnjila mulongolola wa Nzambì. Nzambì wàkalongolola njila kampànda, bôbò kulonda Mùtootò awu too ne mwàkapetàbo Bukènkè bupwàngàne abu. Kaa!

⁷⁴ Bàà pa buloba bàvwa bakèngela Musùngìdi, ditùkù kampànda. Bàvwa bajimine; kabàvwa bacimanyè to. Bàvwa bèèla meeji ne bàvwa basùngidiibwe, kàdi bìvwa bibàkèngela Musùngìdi. Nzambì kulongololaYè Mwànà wa balùme ne, ki Musùngìdi. Bwà cinyi? Muntu mukwàbò nànsha umwe kàvwakù mwà kucyènza to. Kakùvwa muntu nànsha umwe pa buloba, muntu nànsha umwe mu Dyulu, mwaba nànsha wùmwe, uvwa ukumbana bwà kucyènza to. Nzambì wàkabwikila virgò kampànda mundidimbi, yèyè kwimita difù ne kulela Mwànà wa Balùme. Kàdi Mwànà wa Balùme awu kàvwa ní mmwena Yudà anyi wa bàà Bisàmbà byà Bèndè to. Yèyè ùvwa Nzambì, mumwèneshiibwe mu mubidi, Umwèpelè uvwa mwà kupikula awu. Mashi Èndè ngàdi àtùsùngilà. Mashi Èndè ngàdi àtwòndopà. Mpa wòwò Mashi awu patùdi mwà kwimanyina, bwà mulayi kanà wònsò wùtùYe mufile. Nzambì mmulayè bwà kucyènza.

⁷⁵ Nzambì ùtu ùtwilangana ne mukuukwidi ànu mu Mashi, ne mwinshì mwà Mashi. Izalèlèlà ùvwa ne mwaba wùmwepelè wà kutwilangana ne Nzambì. Kabiya mu... Nzambì ùdi ne Mwaba wùmwepelè, leelù ewu, wùdiYe—wùdiYe ùtwilangana ne mukuukwidi; kî nku ba-Méthodistes, ba-Baptistes, anyi beena Mpenta nànsha. Ùdi ùtwilangana nendè mwinshì mwà Mashi. Ki mwaba wùmwepelè mulongolola wùdi Nzambì naawù; kî mmu bulongolodi to, kî mmu nsangilu kampànda to. Kàdi mu Mashi ki mùdi Yesù Kilistò ùtwilangana ne muMukuukwidi. "Pàngààmònà Mashi!" Ki njila mulongolola wa Nzambì nyèyè awu.

⁷⁶ Paanyimà pàà èkèleeziyà mumanè kwikala mutwìshìibwe mu kantu ne kantu, pààkaMumònàbo ne, Yèyè nguvwa Maasiyà awu!

⁷⁷ Mukàjì mutekète wa ku ciinà cyà màyi awu, pààkamukèngelàbi Musùngìdi, bìvwa bimukèngela bwà cintu

kampànda cyà kuleeja. Ùkaavwakù muyààyààye mu èkèleeziyà ne bikwàbò byònsò, ne bàkaavwa bamònèmòne twitabaayi ewu ne twitabaayi wàwa, mu mùshindù wa ne, yèyè kushààla ne ndumbà. Cyòci kumutùma mu mùsèsèsù. Dìngà ditùkù, ùvwa muyè kasuna mbekeci wa mâyi, lwà pa díba dikùmi ne ùmwè wa mundaamunyà nàнку awu, nènku ki Muntu mulùme awu musòmbe mwaba awu; mwena Yudà ewu apa, mu kaaba kaalabale aka. Ki mukàji awu kwambayè ne . . .

⁷⁸ Pààkayàye bwà kupwekesha mbekeci wendè muswikila ku mwonji wà ndòbo, bwà kupeta mâyi awu, kuumvwayè Muntu mulùme wamba ne: “Mukàji, Ntwàdiléku mâyi a kunwà.” Ki yèyè kwamba . . .

⁷⁹ Kukùdimukayè lubilu, ne mwikàle wèla meeji ne Yèyè awu ùvwa ànu mwena Yudà wetù wa pàtupù ewu, bwalu Yèyè ùvwa ànu muntu bwà pà bidì bitàngilà mubidi. Yèyè ùvwa Muntu; ùdya, ùnwa, ulààla tulù, ànu mutùtù twètù twenza amu. Ùvwa muntu menemene mu mùshindù wà ne Ùvwa mwà kufwà, kàdi Pèndè's ùvwa Nzambi. Pashiishe tudi tusangana ne, pàdi . . .

⁸⁰ Yèyè ne “Kacitu cilèlè bwà nwènù beena Yudà kulòmba beena Sàmaalèyà bintu bu nàнку awu to.”

⁸¹ Yèyè ne: “Kàdi bu wíkala mumanyè ne mwine ùdì wakula nendè ewu Nganyi, nùнку wèwè's ngudi mundòmbe Mèmè mâyi à kunwà.” Yèyè ne: “Ndà kangatè bàyeebè kàdi ùlwe mwab'ewu.”

Yèyè ne: “Ncitu ne bàyaanyi bwalà”.

⁸² Yèyè ne: “Wambì bulelèlè. Ùkààvwa naabò bàtaanu, kàdi ùdì musòmbe nendè mpindyewu awu kí ngwebè to.” Cyàkenzekà ncinyi? Nzambi wàkamulongolwela cintu kampànda.

⁸³ Awu ne: “Mukalenge, ndi njingulula ne Wèwè ewu udi mupròfètà. Tudi bamanyè ne pààlwà Maasiyà, Yèyè neàtwàmbilè maalu aa. Ki cyènzàYe ncyòci aci. Ki cidì Diyì dyàmba. Ki citùdì bindile. Mèmè ndi ngumvwa ku mwoyi kùngenda ne mucyòke bwà bintàkanyi byònsò ebi, twitabaayi yàbò ayi ne bikwàbò, Bàfaalèsà, Basàdokà, ne beena Helòòdè, cyònsò cidìbì bifwanyine kwikala aci. Kàdi tudi bamanyè ne Maasiyà kampànda ùlwalwa, pààlwàYe apu. Udi Wèwè wamba bìshi bwà bwalu abu?”

⁸⁴ KwambaYè ne: “Ndi Yèyè awu.” Amen! Nzambi ùvwa mulongòlòle njila. Ki kushiyayè mulòndò wa mâyi awu, mukàji mushintùlùke, ne kubwelayè lubilu mu cimenga, wamba ne: “Lwâyi, kanùmonàayi Muntu Udi mungambilè bintu bìndì mwenzè. Ewu kí m'Maasiyà awu anyi?”

⁸⁵ Peetèlò, munkaci mwà kutèeleja bwalu bùwà Andèlè ùlonda, ne misangu yàbùngì yivwàye mutèèlèjètèèlèje, muumvwè Andèlè wamba mùvwà Yone ùleeja Maasiyà kùdì bantu, pèndè Muntu's, ne bintu byònsò bìvwà munkaci mwà kwenzeka ebi. Bwà Peetèlò

byònsò abi bìvwa bwalu-busokoka. Kàdi dîngà ditùkù kulwayè ne Andèlè, bwà kumòna Yesù. Nènku mmwenzè ànu ùbwela mu Bwikadi bwà Yesù anyì, Yesù kumutàngilaYè, è kwambaYè ne: “Dìnà dyèbè n’Simonà, ne udi mwànà wa Yona.” Nzambì ùvwa mulongòlòle njila bwà Peetèlò kumònayè ne Yèyè ùvwa Nganyì. Ùvwa m’Maasiyà awu.

⁸⁶ Mpindyewu tudi tujandula ne, paanyimà pàà Yesù mumanè kufwà, ne mubànde mu Dyulu, Èkèleeziyà ùvwa ùkèngela Bukolè, bwà kufila bujaadiki. Nzambì wàkabàpèèsha Mpenta. Wakalongolola Mpenta.

⁸⁷ Bidimu binunu bibìdì byäpìci, balunda bàànyì. Bidimu binunu bibìdì mbyebi byäpìci. Mu matùkù a ndekeelu aa, tukàadi bakafika too, muntu ùkaadi mubwelè mu ndongolwelu wa bwena Kilistò ne muCinyangàkàje cyàkàbìdì, muCisopàkàje cilwè twitàbàayi, maèkèleeziyà, màngumba, miyiiki yà mamanya à mu mitù, mu mùshindù wà Bukolè ne cintu cilelèlè cyà Èvànjeeliyò wa Kilistò byumbè bijimine pàmwè ne byònsò. Nènku’s ki twètù aba ne Dìyì dilaya bwà matùkù a ndekeelu aa, ciikalà mwà kwenzeka, ciikalà mwà kwenzeka aci; muntu kèna ùDìitabuuja to. Bàkaadi buumùkeKù. Paùdì umukonka nì mwena Kilistò; ùdi wàmba ne: “Mèmè ndi mwena *cikampànda*.” Aci kacyèna ne cidìci cyùmvwija to. Bikèngela wikalè mwena Kilistò ku dilediibwa. Mpindyewu tukàadi cyàkàbìdì babwejè cintu cyònsò nkòong mu Baabùlònà, paanyimà pàà bidimu binunu bibìdì.

⁸⁸ Èkèleeziyà leelù ewu ùdi ùkèngela Bukolè ne Bulelèlè, cyàkàbìdì. Kaa! Nzambì wàkabiisha Mwan’Endè ku lufù, bwà eci kutàbalediibwaci, bwalu Wàkamba ne: “Katanci kakesè aka bàà pa buloba kabàakuMmòna kàbìdì to; kàdi nwènù nenùMmònè, bwalu Nèngiikalè neenù, munda mwènù mene.” Tudi tusangana, mu Ebèlù 13.8 ne: “Yèyè ùdi umwèumwè awu makèèlèlè, leelù, too ne kashidi.”

⁸⁹ Tudi tusanganaa, mu Maalàki 4 ne, Yèyè mmutùlayè Mukenji mu matùkù à ndekeelu, uvwa mwà “kwalujulula Diitabuuja dyà bantu kùdì baataatù.” Yèyè ngwàkacilaya, mu matùkù a ndekeelu.

⁹⁰ Wàkalaya kàbìdì, mu Yone 14.12 ne: “Ewu udi ungiitabuuja Mèmè, byenzedi bìNdi ngenza neàbyènzè pèndè. Byàbùngi mene bipite ebi, anyi binènè bipite ebi, neàbyènzè, bwalu Ndi nya ku Taatù Wanyì.”

⁹¹ Ùvwa wàkula ditùkù kampànda. Kwambabò ne: “Mulongeshi, tulèèje cimanyinu.”

⁹² Yèyè ne: “Lukòngò lwà butekètè ne beena masandi lùdi lwènda lùkèbanganana ne cimanyinu.” Ki mu lukòngò lutùdì ne mwoyi leelù ewu alu. Yèyè ne: “Nènku Nèmbàpèèshè cimanyinu. Bwalu ànu mùvwa Yona mu difù dyà mushipa wa bälèna, munda mwà matùkù àsàtù à muunyà ne à bufùkù, ki mùdì kàbìdì

Mwânà wa muntu ne cyà kwikala mu mwoyi wà buloba, matùkù asatu à muunya ne à bufùkù.”

⁹³ Ncimanyinu cyà mùshindù kaayi cidi lukòngò lwà beena lwonji ne beena masandi bafwànyine kujandula? Cimanyinu cyà dibiiikà dyà ku lufù. Nènku ki cidi citùlaya leelù ewu, cimanyinu cyà dibiiikà dyà ku lufù cyà ne Yèyè ùcidi ànu ne mwoyi, Yèyè udi umwèumwè awu makèèlèlè, leelù, too ne kashidi.

⁹⁴ Yèyè ne: “Ànu mwàkadibi mu matùkù a Lotà,” bu mutwàcikenkèci makèèlèlè dilòòlò awu. “Matùkù a Lotà, cyàkenzekà mu matùkù a Lotà aci, ki mwikalàbi kàbidi ku dilwa dyà Mwânà wa muntu.” Bintu bìdi bitùlaya ebi, Mifùndu mikwàbò yàbùngi. Bwà kubènga kupicisha dîbà. . . “Katanci kakesè bàà pa buloba kabààkuMmòna kàbidi to. *Kosmos*, ‘ndongolwelu, cikondo cyà èkèleeziyà,’ kabààkuMmòna kàbidi to. Kàdi nwènù nenùMmònè, bwalu Nèngiikalè neenù, munda mwènù mene, too ne ku ndekeelu kwà cikondo.” “Yesù Kilistò umwèumwè awu makèèlèlè, leelù, too ne kashidi.” Ncinyi ciinè aci? Ncimanyinu cilongolola cyà Nzambi, njila mulongolola wa Nzambi.

⁹⁵ Abraham munkaci mwà kwindila mwânà wa balùme. Cimanyinu cyà ndekeelu cyàkamònàye kumpalà kwà kabùtù kàà bàà Bisàmbà byà bendè, civwà n’Nzambi mumwènèshilbwe mu mubidi wà buntu, wàkamanya minsokòntù yà mu mwoyi wà Sarah pàvwàye mu ntentà apu awu. Yesù wàkamba ne: “Aci necipinganè cyàkàbidi ku dilwa dyà Mwânà wa muntu.” Mwanèètù wa balùme, mwanèètù wa bakàji, ndi mèmè ngiitabuuja ne tudi ne mwoyi mu ditùkù adi. Mèmè ndi ngiitabuuja ne edi ki ditùkù dyà mulayi adi.

⁹⁶ Bikèngela wikalè ne diitabuuja mu cyùdi wenza. Wèwè kùyi ne diitabuuja to, pawikala ùcyàngata ànu ku didicinkila cyanààna. . .Mwakù *kudicinkila*, bilondèshile Webster, ùdi ùmvwija ne, “kudyèla mu bwalu bwà njìwù kùyi ne dyanyisha to.” Kàdi pàdi Diyì dicilaya, ne Nzambi wimana paanyimà pàà Diyì adi, kwèna udicinkila kàbidi to. Udi wenza ànu menemene cidi Nzambi mwambè bwà kwenza, ne Yèyè mmwena dibànzà dyà kuCitwa nyama ku mikòlò.

⁹⁷ Mwenji wa—wa matàbuluja, mumanya bìmpè, kùkaadi bidimu byàbùngi, ngàkamumòna pàncivwà mwânà mukesè, ùvwa m’Paul Rader. Wàkalonda bwalu kampànda, dîngà ditùkù, bùtù bundamàte misangu yònsò. Yèyè ne: “Dîngà ditùkù, tuvwa tukòsa nkùnyi.” Yèyè ùvwa mukòsolodi wa micì, mu Oregon mwàmwa, ki yèyè ne mfùmwendè wa mudimu kumwambilayè bwà kubàndàye ku lusongo lwà kakùnà. Ùvwa munkaci mwà kulòòta. Kùvwàye usanganyibwa mu bulelèlè, mwinè musangu awu, ùvwa mu bisanga; ki kusaamayè mubidi kapyà, wèbè wà ngwengwengwe awu’s, nènku ùvwa ùpunga ne lufù.

Kuyabò kakèba ngàngàbukà kampànda, kàdi cìvwa ntàntà wa maakilomèètà ne maakilomèètà, bayè mu bwàtù bwà diita.

⁹⁸ Kumpàla kwà ngàngàbukà kukùfikayè, Paul kubangayè wenda úfwatalala, útamba kusaama. Ki kubiikilayè mukàjèndè wa lulamatu awu. Kwambayè ne: “Munanga wanyì, mu cibambalu emu mùdi mwènda mùfiika, mùtamba kufiika, byènda bibwita.” Ki ùmbà ùbwela mu kòmâ.

⁹⁹ Dyà ùbwela mu kòmâ nùнку, kwambayè ne wàkalòòta, pàvwàye mu kòmâ apu ne, mfùmwendè wa mudimu kumutùmayè bwà àkakòsè mucì kampànda. Kusanganayè mucì awu, kuupulayè mucì awu, kupàyikayèmu kasuyi kèndè, ne kwololayè byanza bwà kuwàmbùla. Kàvwa ànu mwà kuwùjuula pànshì to. Kwambayè ne dikànda dyèndè dívwa dikèèpèle. Kàvwa ànu mwà kuwàmbùla to. Yèyè ne: “Bunènè bwònsò bùdi mucì awu abu, ncyà bushùwà ne mèmè ndi mwà kuwàmbula. Ngánjibi kuteeta cyàkàbìdi.” Ki kupwekelelayè è kujuulayè, kukwàtayè ànu mudimu mukolè too ne mwàkazengelàye. Kusòmbelayè pànshì ku luseke lwà mucì awu, kwambayè ne: “Ncyèna ànu mumanyè cìngènza to. Mfùmwanýi wa mudimu pèndè's ùdi ùlòmba bwà kupweka ne mucì ewu ku citùùdilu kwàka, eku mèmè pàànyì mutàmbe kuteketa bwà kupweka naawù.”

¹⁰⁰ Kwambayè ne wàkùmvwa Díyi ditàmbe kwikala dyà kalolo dikààvwàyekù mumvwè, ùvwa mmfùmwendè wa mudimu uvwa wakula; kàdi yèyè ne, pààkakùdimukàye bwà kumòna ne mfùmwendè wa mudimu awu ùvwa nganyì, ùvwa m'Mukalenge Yesù. KwambaYè ne: “Paul, cyùdi ulwangeena nàнку ncinyi? Cyùdi ulubakeena nunku ncinyi? Udi umòne màyi àdi àpwekà kwàka àa anyi?” Yèyè ne: “Bwà cinyi kùyì ànu wela citùpà cyà mucì aci mu musulu amu, ne kupweka naaci mubàndepù? Pweka mubàndepù too ne ku citùùdilu.”

¹⁰¹ Kutùpikilayè pa citùpà cyà mucì aci è kubangayè kupwekela pamutù pàa mavwala à bijèngù awu, wènda wèla mbilà mikolè ne díyi dinàngula. “Ndi mubàndepù! Ndi mubàndepùpu!”

¹⁰² Mwanèètù wa balùme, mwanèètù wa bakàjì, Yesù Kilistò wàkalaya ne bintu ebi nebyènzekè mu matùkù a ndekeelu. Ndi ngiitabuuja ne ki kutùdi ne mwoyi eku. Ndi ngiitabuuja ne Yèyè ùdi umwèumwè awu makèèlèlè, leelù, too ne kashidi. Mèmè ncyèna mumanyè mudibi byenzèke to, kàdi ndi ngenda mubàndèPù. Ndi ngiitabuuja ne Cìdi Bulelèlè, bwalu Ng'Èvànjeeliyò, njila mulongolola wa Nzambì. Ndi ngiitabuuja ne m'Mukenji wà díbà edi, cikondo citùdi ne mwoyi eci. Nnjila mulongolola wa Nzambì. Ndi mubàndèPù!

Kanwènaayikù baswè bwà kutùpikilapù pàmwè naanyì, patùdi twinyika mitù yètù apa anyi?

¹⁰³ Taatù wa mu Dyulu, tudi tubwela mu Butùmbi babànde pa Díyi Dyèbè. Tudi twitabuuja ne Díyi Dyèbè didi Bulelèlè. Èyi

Nzambì, swàku bwà mulùme yònsò ne mukàjì yònsò, dilòòlò edi, bàbandè pa Dìyì, ne bavùlukè ne, pàdìbo bènda bàpwèka mu lwendu apu, bàdi mwà kujìkula ne: “Ndi mubànde pa mulayì wà Nzambì. Newùkambwejè buludì mu Butùmbi. Ki njila udi Nzambì mundongòlwele leelù ewu nyèyè awu. ‘Yesù Kilistò umwèumwè awu makèèlèlè, leelù, too ne kashidi.’”

¹⁰⁴ Wèwè wàkamba ne: “Katanci kakesè bàà pa buloba kabààkuMmòna kàbìdi to, kàdi nwènù nenùMmònè; bwalu Nèngìikalè neenù, munda mwènù mene.” Wèwè utu mutùlayè, Mukalenge, ne netùKumònè.

¹⁰⁵ Beena Ngèlikà bàakalwa, musangu kampànda, kwambabò ne: “Bakalenge, tudi baswè kumòna Yesù.” Nènku bóbò bààkapèèshiiibwa dyèsè adi. Nènku dilòòlò edi, Mukalenge, tudi baswè kuKumòna, twètù pèètù. Ki dijinga dyà myoyi yètù. Muntu nànsha umwe kèna mwà kuumvwa bwalu Bwèbè, kayi ùjinga kuKumòna to. Pashùshe piikalàbi ne beena Ngèlikà aba bààkaanyishiibwa bwà kuKumònabò, ne Wèwè kutùlongolwela njila bwà twètù kuKumòna, Wèwè utu misangu yònsò ànu upenga njila bwalu Udi umwèumwè awu makèèlèlè, leelù, too ne kashidi. Musadidi kampànda wàkabweja beena Ngèlikà aba mu Bwikadi Bwèbè, nènku kufikabò ku diKumòna. Tùpèèshèku dyèsè dimwèdimwè adi dilòòlò edi, Taatù. Swàku bwà twètù, bu basadidi, tufikishè batèèleji aba mu Bwikadi Bwèbè. Nènku swàku bwà tùmònè Yesù, dilòòlò edi, Yèyè udi umwèumwè awu makèèlèlè, leelù, too ne kashidi. Enzàku nàнку, Mukalenge.

¹⁰⁶ Sùngilàku bajìmine, Mukalenge, ní kùdìku mulùme, mukàjì, mwànà wa balùme, anyì wa bakàjì. Patùdi tumòna ditùngà dyètù dikoooyike bikolè ne bashebeyanganyi ne bakòshanganyi bàà miminu, ne bantu bakònyàngàle, ne pa kumòna dinyanguka mu ditùngà leelù ewu’s! Ne pa kumòna dinyanguka mu maèkèleeziyà, ne kubàmòna bàlombolangana ku cishipeelu cyà nsangilu wa èkèleeziyà wa buloba bujimà kuntu kwàka, mbwalu kabèena bàlonda njila mulongolola wa Nzambì to! Bàdi bàlonda njila wa twitàbàayi kampànda pamutù pàà kulwila ku Dìyì.

¹⁰⁷ Nzambì, tudi tulòmba bwà beena Kilistò balelèlè, bashùwashùwàle, baledìibwe cyàkàbìdi, bu mungàcìleeji mu cifwànyikijilu, mu kwikala mabata malelèlè, bóbò. . . “Mikòòkò Yànyì yìdi yùmvwa Dìyì Dyànyì, kayààkulonda mwenyi nànsha.” Mukalenge, Dìyì dyà mukana Mwèbè n’Dìyì. Aci ncitù misangu yònsò ànu njila Webè mulongolola bwà Èkèleeziyà ne bwà bantu, n’Dìyì Dyèbè. “Dìyì Dyèbè m’Bulelèlè.” Ne Wèwè udi Dìyì. Ne Bible ùdi ùtwàmbila ne: “Dìyì dyà Nzambì nditwè kutàmba mwelè wà mvità musàkisha nseke yìbìdi, dijinguludi dyà meeji ne mapàngadika à mu mwoyi.”

¹⁰⁸ Bwà cinì Izàlèlèlè kàvwakù mwà kumòna Maasiyà wabò, pàakamònàbo ne Yèyè ùvwa Dìyì adi, pàvwàYe mwà kujingulula meeji àvwà mu mwoyi wàbò apu? Bwà cinì kabààkamòna?

S'baàkacyùmvwila ku baprófeta, bwà ne baprófeta bàvwa mwà kucyènza; kàdi pàakavwijibwà kaabujimà kàà Nzambi mu Mwân'Èndè, ne Yèyè kwikala ne mwoyi munkaci mwètù, pashiishe kupangabò kucimòna bwalu bàvwa bafofòmijibwe.

¹⁰⁹ Mukalenge, aba bàdi ne mèsù àbò matàbàle, dilòlò edi abu, swàku bwà tùmone Yesù munkaci mwètù. Swàku bwà mubèèdi yònsò òndopiibwè. Swàku bwà eci cikosè bwalu, Mukalenge, bwà kashidi kààbò, kàbidi, kuumukila ànu ku díbà edi... kabènji cingà cintu ànu kwitabuuja ne Wèwè ki Maasiyà awu. Bàdi bàlwa biikàle bàlonda njila wa Nzambi. Bààbúngi bàà kùdìbò bàdi mwab'ewu, dilòlò edi, bàpunga ne lufu. Kùdi bààbúngi kaaba aka, dilòlò edi, bìikalà pàmwàpa kabàyi mwà kwikala kaaba aka lumingu kuumukila ku leelù ewu to, bu Wèwè, dikwàcisha Dyèbè dyòdi kadiyi dilwè to.

¹¹⁰ Mpindyewu, Taatù, Wèwè ùdi mwambùle bujitu ànu bwà Cyùdi mulayè. Kàdi Wàkalaya cyà bushùwà ne twètù netùKumòne. Wàkalaya ne ciwàkenzà Wèwè netùcyènzè pèètù. Ki díbà ndyòdi edi. Nyewù ngaacijikulu; ndi ncìitabuuja. Nkàadi muKuumvwè wamba nàнку; Díyi Dyèbè didi dyamba nàнку. Wèwè ucishindika. Ndi mumanyè ne ncilelèlè. Mpindyewu cimanyiibwèku, Mukalenge. Ncifundibwe, mpindyewu swàku cyènzekè, bwà bwalu bwà Bukalenge bwà Nzambi. Amen.

¹¹¹ Ncyèna ngeela meeji ne netùbiikilè mulongo wà babèèdi to. Ngeela meeji ne nènkwatè naaci mudimu ànu kumuukila mwab'ewu mene.

¹¹² Mbanganyi bàà kunùdi aku bàdi bàsaama? Mpindyewu swàyikù... Udi mulamè cianza cyèbè, ujaadika ne udi usaama.

¹¹³ Mbanganyi bàà kunùdi bàdi baswè kufila bujaadiki mùshindù wùmwèwùmwè awu ne: “Mwanèètù Branham, ncyà bushùwà ne mémè ncyèna musùngidiibwe to”? Udikù mwà kwela cianza muulu ne: “Nsambidilèku” anyi? Nzambi akubènèshè, wèwè. Abi mbímpè. Aci cidi... Nzambi akubènèshè. “Mémè ncyèna musùngidiibwe to.”

¹¹⁴ Mpindyewu, nwènù bèdi byanza muulu, ne nwènù bàdi kabàyi beelè abu: “Kàdi, Mwanèètù Branham, cyà bulelèlè ndi muswè kwikala musùngidiibwe. Ki cidi mu mwoyi wànyì. Ndi ngiitabuuja ne kakwèna cintu nànsha cimwè cidi cishaàale bwà muntu kampàndà nànsha umwe pa buloba to.” Ncinyi cikwàbò, ncinyi cyùdikù mufwànyine kukumbaja, cidi cifwànyine kwikala cinène kutàmba lupàndù lwèbè? “Nsambidilèku. Ndi muswè kusùngidiibwa.” Udikù mwà kwela cianza muulu, mu citanda cijimà emu anyi, mwaba wònsò nàka ne: “Ndi muswè...”? ”

¹¹⁵ Mbanganyi bàà kunùdi bàtù kabàyi banji kupeta Nyumà Mwímpè, bàmbè ne: “Ndi mumanyè ne ndi ne cyà kuMupeta”? Elàayi byanza byènù muulu. “Ncyèna Nendè to; ndi muswè kuMupeta.” Eyo, kùdi búngi buvùmvùka bàdi kabàyi banji kuMupètè's.

116 Mpindyewu, Kilistò ùtu ùshààla mukwàte ku Dìyì Dyèndè, kàdi bìdi binùkèngela kulama diitabuuja dyènu mu Yèyè. Yèyè ùdi Dìyì. Mpindyewu, Ebèlù nshapità mwi4, mmwambè ne: “Dìyì dyà Nzambì,” didi Kilistò adi’s. Kilistò ùdi Dìyì. Nwènu bònso nudi bamanyè nànkù anyi? Ambàayi ne: “Amen.” [Disangisha didi dyamba ne: “Amen.”—Muf.] Yèyè ùdi Dìyì, “umwèumwè awu makèèlèlè, leelù, too ne kashidi.” Cìwàye mu Mòsà aci, ncìwàYe kàbìdi mu Eliyà; cìwàYe mu Eliyà aci, ncìwàYe mu Yone; cìwàYe mu Yone aci, Wàkadikùmbajila Yèyè mwinè mu—mu Yesù. Ne leelù ewu Yèyè ùdi umwèumwè awu ànu mùvwàYe musangu awu amu, ne Cìcidi ànu Dìyì dyà Nzambì dyamba mu cipròfetà bwà ditùkù edi, cìdi cyènza ne Yèyè ikalè Bukènkè bùdi bùkenkeshà ne bùshindika Dìyì dilaya.

117 Tukàadi ku cikondo cyà nshìikidilu, nwènu balundà bàanyi. Yesù ùdi kaaba aka. Ndi mumanyè ne nukàadi bumvwè cyòci aci.

118 Ambàbi tǔng bu ne kacya kùtukù mwanji kumòna, kacya bàakulela, ne kùyikù mupetè cyumvwilu cyà lumònu, muntu nànsha umwe kàyi naaci to, kàdi ku musangu ne ku musangu wèwè umvwa luuyà lukolè menemene? Kàdi eku mèmè mwikàle ne lumònu kampànda, mwikàle mwà kumòna, ne mufwànyine kukwambila ne cìwà n’dìbà. Wèwè wamba ne: “Ncyèna mumanyè mùdìbi byènzeka to, kàdi ndi nguvmvwa cintu, cyenzè bu luuyà nànkù, mùdi wèwè mwà kuumvwa amu.”

Mèmè ne: “Kàdi’s ki dìbà ndyòdi adi.”

“Dìbà ki cinyi?”

“S’mbukènkè kampànda.”

“Bukènkè ki cinyi?” Ncìfwànyine cyònsò aci kwiukala buloba bupyabùpyà kùdi wèwè.

119 Kàdi bu mèmè mwà kunwàmbila ne Yesù Kilistò mmwimàne mwaba ewu mpindyewu? Kàdi bu mèmè mwà kunwàmbila ne Yèyè ùdi munkaci mwètù emu? Yèyè ngudi mucilayè. “Mwaba wònsò wùdi bàbìdi anyi bàsàtù badisangishe mu Dìna Dyànyi, Mèmè ndi munkaci mwàbò. S’ki Mèmè ewu!” Mpindyewu aci cìdi anyi Bulelèlè, kùndi mèmè, *Eci* cìdi cyònsò Bulelèlè, anyi kaCyèna Bulelèlè mu kantu nànsha kàmwè to. *Eci* cìdi anyi cyà Bushùwà, anyi kí ncyà bushùwà to.

120 Mpindyewu, bwà bìdi bitàngilà kukusungila wèwè, Yèyè ngwàkenza aci pàakafwàYe ku Kàlvariyo apu. Kukwondopa, Yèyè wàkacyènza pàakafwàYe ku Kàlvariyo. Wèwè itàbuuja cyòci aci. Dìyì ndyambè ne Yèyè wàkacyènza.

121 Mpindyewu cintu cìmwèpelè cìdiYe mufwànyine kwenza, bu ne Úvwa mwimàne kaaba aka muvwàle—muvwàle nkooci ewu, udiYe mumpèeshe ewu, ncìfwànyine kwikala ànu kukujaadikila ne Yèyè ngudi Maasiya.

122 Kì nku bibangu byà mputà yà misonso mu cyanza Cyèndè nànsha. Mwena lubombo kanà yònsò ewu ùdi mwà kwenza

aci, kwenza bibangu byà misonso, ne mashi kwisù kwèndè, ne bimanyinu ne bikwàbò. Aci cidi mwà kwenjiibwa. Aci cikaadikù cyenzèkènzèke. Bantu bààbùngì bàkaadi mene beediibwe ku nkùrusè bu Yèyè. Kí ng'aci to.

123 Kàdi Mwoyi Wèndè, cìvwà munda Mwèndè aci! “Mwànà kèna mwà kwenza cintu nànsha cimwè to, mu Yèyè mwinè, ànu cidìYe ùmòna Taatù wènta.” Mwoyi wùdi munda Mwèndè, ki wùvwà wùjaadikà. Cìvwà cifikishe mukàji mukesè wa ku ciinà cyà màyi awu ku diitabuuja ne Yèyè ùvwà Maasiyà awu ki mbwalu Yèyè ùvwà mwena Yudà to; mbwalu Yèyè ùvwà mwà kujingulula meeji àvwà munda mwà mwoyi wèndè, ki cyàkenzà ne Yèyè ìkalè Maasiyà. Pìikalàbi ne mùshindù awu ngwàkaDileejà Maasiyà mu matùkù à kale wàwa awu, ki cìvwà njila Wèndè mulongolola bwà kuDimanyisha ncyaci. Ki cidi njila Wèndè mulongolola, bilondèshile Mifùndu, bwà cikondo eci. Nudi nwitabuuja nànkù anyi?

124 Mpindyewu, yònsò wa kunùdi mwab'ewu, mèmè ndi mwenyi. Ngakènzakanyi, ncyèna mmòna muntu ùndiku mumanyè to. Bantu bònsò mwab'ewu, bàdi kabàyi bammanyè abu, ne bamanyè ne ncyèna mumanyè kantu nànsha kàmwè pa bidì binùtàngila, elàayi byanza byènù muulu. Nkacya ànu byàmònangana's, myaba yònsò. Muntu udi mulàadika apa pa kalààlù kàà dibùnya aka ewu, mmwelè cyanza muulu. Kàvwa mummanyè to. Muntu nànsha umwe kí mmummanyè to.

125 Kàdi vùlukà ne, Nzambì mmukumanyè. Nzambì mmukumanyè. Mpindyewu, Yèyè mujaadike ne Ùdi kaaba aka.

“Ncinyi ciinè aci, Mwanèètù Branham?” Ndi pà kampànda.

126 Dipà ncinyi? Dipà ncinyi's, twamb'eku twamb'eku? Kí nkwangata cintu kampànda ne kukwàta mudimu ne cintu kampànda, kwamba ne: “Ndi ne dipà dyà dyondopa! Ntu mpàtuka ne ngondopa *ewu*, ngondopa *wàwa*” to. Bu ne mvwà mwà kucyènza, ncyà bushùwàu mvwa mwà kucyènza. Mpindyewu, kàdi, dipà, nènku nudi—nudi. . . Nudi nuumvwa dipà bibi's. *Dipà* didi ànu “kudyùmusha wèwè mwinè mu njila kàdi kulekela Nyumà Mwîmpè ùkwàta neebè mudimu's.” Nwamònu anyi? Ki dipà ndyòdi adi.

127 Ki cidi mwambi ncyòci aci. Kàtu ùyiisha cidìye muswè kuyiisha to. Ùdi ùdyùmusha ànu mu njila, ki dipà ndyadi, ne disonsodiibwa dilwa, nènku yèyè—yèyè wàkula ku disonsodiibwa dyà Nyumà Mwîmpè. Dipà dikwàbò kanà dyònsò didi mùshindù wùmwèwùmwè awu. Mpindyewu, mapà a bwambi, ne bikwabo, ki mutubi's. Kùdi, dyàmbedi, mapà mafila kùdi Nzambì, àdi, “kumpàla bàpostòlò, bapròfetà, balongeshi, bampaasàtà, ne batangadiki.” Kí midimu nyòyi ayi. Ki mapà ètù ngòwò awu.

128 Mpindyewu, Yesù Kilistò wàkalaya ne Yèyè neenzè cyòci eci mu matùkù a ndekeelu. Yèyè ùcyènza, Yèyè ùlaya ne

mucyenzè, mbanganyi bààmwitabuuja ne bààmwitabà, dilòòlò edi? Elà cianza muulu, wámbe ne: “NémMwitabè.” Mbanganyi mwab’ewu díbà adi. . .Twasàkidilaayi. Mbanganyi mwab’ewu batu kacya kabàyikù banjì kubwela nànsha mu òmwè dyà ku masangisha kwónso eku, elàayi byanza muulu. Ekelekele, pámwè ne cyàbìbìdì cyà musumbà ewu. Mbanganyi bàdì bìtabuuja, kumpàla kwà Yèyè kucyènza, nwitabuuja nànsha bìshi? Nzambi ànùbènèshè.

129 Mpindyewu tàngilaayi. Pìikalàbì ne ndi munwámBILE Bulelèlè, Nzambi mmwenzèjìbwe bwà kungandamuna. NeÀngandàmùnè. Ûdi ùtèeka Mèyi Èndè mukana mwèbè ne Wówò àngata mubidi. Ncyà bushùwà, M’Mèyi Èndè, Cìdi ne cyà kwenza nànkù. “Ngàtumu Dìyi Dyanyi, kaDyàkupingana kadiyi ne cìdìDi dyenzè to.”

130 Mpindyewu, bu ne mèmè mvwa mwà kwondopa, mvw’a kucyènza. Ànu bu wa kuneemekiibwa, mufwe wetù, Mwanèètù Upshaw mwena bwalu butùvwà tulonda abu awu. Mukùlumpè awu musòmbè mu ndekeulu mwàmwa mu dikalù dyà balèma adi, mukùlàkàjì wa bukìtù awu, mvw’a kwikala mumwondòpe bu ne mvwa ne mùshindù. Nkààvwa ngenda nguumuka pa cibumbà cyà ku cyambilu, bwà kwamba menemene, ki mèmè kukùdimuka e kumumòna mu cìkèenà-kumòna, uya, wèndela kuulu. Mèmè kumubìkila, kumwambila cìvwà bwalu, ne ki mùvwàbì. Kujuukayè e kwenda, kufikayè pa cibumbà cyà ku cyambilu, kulengayè bânà bèndè bàà nkàsà, paanyimà pàa mucibùkile panshi munda mwà bidimu makùmi àsambòmbò ne bisambòmbò. Nwamònu anyi?

131 Dilòòlò dimwèdimwè adi, inàbànza kampànda wa bafiike, mwikàle ne mwanèndè wa mu dibòko, kwìnshì ku luseke kwàka. Mèmè kwamba ne: “Ndi mmòna ngà—ngàngàbukà muvwàle bìnètè, ne—ne mmupandè mwànà wa bakàjì mukèsè, wa bafiike, kàdi ncimutekèshe mubidi kubangila pa muminu.”

132 Mukàjì mukùlumpè wà bafiike, kùyikù mufwànyine kumuumusha pa cibumbà cyà ku cyambilu apu to. Yèyè kwamba ne: “Mukalenge, luse, s’mmwanàanyi awu!” Ki yèyè ulwàlwa ewu, musumbà wa baawìsiyè kabàyiku nànsha mwà kukòòkesha kumulama to.

133 Mèmè kwamba ne: “Tàntinè, kabyàkwikala ne dikwàcisha bwà kubànda kùneeku to. Kì. . .Awu n’Nzambi.” Mèmè ne: “Kabyàkwikala ne dikwàcisha bwà wèwè kulwa apa to. Itàbùjja ànu cyanààna.” Kì kudyèlaye ku binù ne kubangayè kusambila. Mèmè kutàngila mu batèeleji amu ne kumòna, cyenzè bu kajila, kènda kàya. Mèmè kumòna mwànà wa bakàjì mukèsè wa bafiike mwikàle ne ciipòpì mu mabòko, wènda ùpwekela mu kajila amu. Ki mèmè kutàngila kànà kakesè, kàà bakàjì kàà bafiike aku, ngeela mèsù paanyimà, ne kàvwa nkòkò kàmwekàmwe aku.

Mémè ne: “Cyándàmùnnyìbù.” Kujuukaye kuulu, e kuumukayè mu kalààlù kàà babèèdi aku. Nwamònu anyi?

¹³⁴ N’Nzambì’s. Nwamònu anyi? N’Nzambì. Nwamònu anyi? Yèyè kèna mwà. . . Muntu nànsha umwe kèna mwà kwondopa to. Ndiitabuuja dyèbè mu Nzambì.

¹³⁵ Mpindyewu, Bible mmwambè, ne: “Yèyè ùdi Mwakwidi Munènè, mpindyewu mene, udi mwà kulengiibwa ku dyumvwa dyà mateketa ètù.” Nudi nwitabuuja nàнку anyi? Mwakwidi Munènè! Mpindyewu, piikalàYe Mwakwidi Munènè, mMufwànyine kwenza munyi? Piikalàbi ne Yèyè ùdi umwèumwè awu makèèlèlè, leelù, too ne kashidi, Yèyè’s mmufwànyine kwenza byà mwomùmwè makèèlèlè, leelù, too ne kashidi.

¹³⁶ Mpindyewu sambilaayi, ne lekèèlaayi Nyumà Mwîmpè dîbà adi. . . Ambilà Nzambì ne: “Nzambì, muntu udi mwimàne pààpa wàwa kî mmummanyè to, kàdi cìdiYe Yèyè wàmba ncìdi cyùmvwika cyà meeji. Wèwè udi umwèumwè awu. Udi Kilistò. Mémè ndi nsaama. Ndi ne dijinga. Ne bu Wèwè mwà kundekela anyi. . . Pàngìikalà nciyi ne diitabuuja dyà kucyènza to, enzàku bwà muntu kampànda ùndi mumanyè àpetè yèyè diitabuuja, ne swàku ciikalè. . . Biikilàku ne enzàku bwà—bwà—bwà mémè anyi muntu awu kulengayè luzemba lwà Civwàlù Cyèbè mu Butùmbi. Pashiishe piikalàbi ne muntu wàwa mmuumùke mu njila, dîbà adi Wèwè ùkwatè mudimu ne mukana mwèndè bwà kwandamuna, nènku wènzè ànu mùshindù wùmwèwùmwè wuWàkènzà paÛvwà pa buloba awu. Nèmmanyè ne Wèwè udi umwèumwè awu makèèlèlè, leelù, too ne kashidi.”

Twînyikààyaaku mitù yètù mpindyewu.

¹³⁷ Mukalenga Yesù, nguumuka ku butangadiki nya ku mudimu wà cipròfetà, kàdi nànsha nàнку ndi nKwitabuuja, Mukalenge, Wèwè ngwàcacilaya. Nènku ndi ndòmba bwà Wèwè kucifila, dilòòlò edi. Enzàku nàнку. Nguumvwilakù. Pùùmukà batèèleji aba mwaba ewu, dilòòlò edi, ne twètù kwalukila kumbèlu, twàmbèku mwàkambà bàvwà bàfùmîna ku Êmawùsè abu ne: “Myoyi yètù kayìvwakù yilàkuka kapyà munda mwètù pàvwàYe wàkula neetù mu njila apu anyi?” Yesù ùvwa mubiishìbwe ku bafwè; bóbò kabàvwà bamanyè to. Uvwabò bààkula nendè awu ùvwa n’Yèyè; kabàvwà bacimanyè to. Kàdi pààkabwelàYe naabò mu nzùbu amu, ne kukàngabò ciibi, dîbà adi kwenzaYè cintu kampànda mùshindù wàkucyènzaYe kumpàla kwà dipoopediibwa Dyèndè dyà pa nkùrusè amu. Aci kubàkàngulaci mèsù. Kumònabò ne ùvwa n’Yèyè. Cyàkàbìdi, Mukalenge, myoyi yètù yilakukèku kapyà patùdi twalukila kumbèlu dilòòlò edi apa, mwàkalàkukà yàbò amu. Bwalu tudi bamanyè ne Wèwè udi mwakùle neetù mu njila. Enzàku bintu, dilòòlò edi, biWàkènzà paÛvwà pa buloba abi, bwalu Wèwè udi umwèumwè awu makèèlèlè, leelù, too ne kashidi. Tudi tulòmba mu Dìna dyà Yesù. Amen.

138 Mpindyewu ikàlaayi mu disambila ne itàbùùjaayi ànu cyanààna. Twánjàayi kudilàmbwila *elu* luseke, dyàmbedi. Nànsha wèwè usanganyibwa penyi, mu citanda emu, itàbùùjà Nzambi. Ndi njingakù ne muntu yònsò ikalè mu kaneemu kàà menemene ne musómbe mupùwe, ùsambila.

139 Eci kacýènakù mwà kwenzekaku to nànsha bishi. Mwva ngaakula mu dindà emu, ku didyà dyà bambi pa, “cidikà.” *Cidikà* cyà kabàyikù mwà kwitabuuja to, n’“cintu kampànda cyà kabàyikù mwà kwitabuuja to, kàdi ciikàle cilelèlè.” S’nudi bamanyè ne Nyumà Mwímpè mmufwànyine kwimana apa ne kwamba cintu kampànda mu batèeleji amu, wàmabila bantu bândi ncýi mumanyè to, s’bìvwa bikèngela kwikalacì cidikà. Ncintu kampànda cidì kacýi mwà kumvwijiibwa to. Ncyèna mumanyè ne Yèyè neàcyènzè to. Ndi mutèkèmène ànu ne neÀcyènzè, ngeeyemena ne neÀcyènzè.

140 Mpindyewu sambilà ànu cyanààna, wamba ne: “Mukalenge Yesù, ndi muswè ndengèku civwàlù Cyèbè, ne mèmè ndi—ndi ne dijinga. Ndi nKulaya, Mukalenge ne, nê—nênKukwàcìlè mudimu matùkù àanyì ònsò à mwoyi.” Nzambi mmuswè bwà wèwè kunyingalala. Pawikalà kùyi munyingalàle to; nyingalàlè, wàmbè ne: “Ndi muswè kunyingalala, Mukalenge. Ndi muswè bwà Wèwè kungondopa. Ndi muswè bwà Umbènèshèku. Ngondòpaanyi mpindyewu Mukalenge. Ndi musadidi Webè.”

141 Nkaavwa... Nudi bààbanyè twartà twà disambila anyi? Nkàvwa ànu ne nkonkè Billy ní ùvwa... Yèyè kàyi ùcyènza to, ndi mufwànyine kubìikila mulongo wà babèèdi. Kàdi kabèènakù bààbanya twartà twà disambila leelù ewu to. Sòmbaayi ànu mu kaneemu, itàbùùjaji.

142 Mpindyewu, mu Dìna dyà Yesù Kilistò, ndi nkwàta nyumà yònsò udi mwaba ewu ku bukòntononyi bwànyì mèmè, bwà butùmbì bwà Nzambi, bwà Dìyì Dyèndè dyàmona mwà mu kumanyishiibwa, bwà mu Ditùkù dyà Cilumbulwidi katwikadikù ne kàbingilà nànsha kàmwè to.

143 Mpindyewu kàngilà mu nùnkù ewu, ne itàbùùjà mpindyewu. Sambilà ne mwoyi wèbè wònsò, ne sambilà ànu cyanààna, ne didìpwekesha dyònsò. KùCìlwishiku to. Dìlekèlèlè ànu cyànaàna, wàmbè ne: “Mukalenge, Wèwè ngudi mwenzè mulayi awu. Mèmè ndi nKwitabuuja.” Ki cìndi ne cyà kwenza ncyòci aci.

144 Ndi mumanyè ne kabyèna bikèngela bwà nnùkonkè to. Mbanganyi bàkààdiku bamòne Bukènkè abu? Tumonàayibi. Nukàadi bamòne fòtò waBù. Tùmonàayibi byanza byènù, aba bàkàadiku bamòne fòtò waBù. Kanwènaayikù nuBùmòna mwaba wàwa mene anyi? Nwamònu’s, mmu cipaapu cikwàbò. Bùdi kumutù menemene kwà inàbànzà wàwa.

145 Ùdi ne lutàtù lwà ùsaama mikòlò ne nyimà. Yèyè... Udi witabuuja ne Nzambi ùdi mwà kukwondopa anyi, mwanèètù wa

bakàjì? Ciwàlèngì ncinyì? Kwèna mummanyè to, kàdi wàlèngì Cintu kampànda's. Bu Mukalenge Yesù mwà kungambila ne wèwè udi nganyì, aci ncifwànyìnekù kukufikisha ku diitabuuja byà bitàmbè bwìmpè anyì? Udi Mandàmù Phillips. Aci ní ncyà bushùwà, juukilà kuulu. Èyo. Ndi mwenyi ànu wa menemene kùdi anyì? Elà cyaanza muulu ní ncyà bushùwà. Kacya bàndela ncitukù mwànji kumumòna to. Cyèlèngiye aci ncinyì? Nukayiikilè ne mukàji awu, paanyimà. Bisaamà abi mbiyè byònsò mwamwamwa patùdi twakulangana apa. Udi bìmpè. Udi mwà kwalukila kwèbè ne kwikala musàngàle.

146 Ki inàbànzà nyèyè ewu, ànu paanyimà pèndè menemene apu. Ùdi ne disaamà dyà mpàla. Èyi Nzambì wa yaaya, yèyè kàyi. . . Dìna dyèndè m'Màndàmù Star. Itabùùjà, Yesù Kilistò neàkusàngàjè. Juukilà kuulu wìtabuuje dyondopiibwa dyèbè. Mèmè mwikàle mwenyi kùdi, nyungìsha byanza byèbè. Disaamà dyèbè dyà mpàla adi dyàjikì. Yesù Kilistò wàkondòpù.

147 Cyàkalayàye ncinyì? Yèyè ngwàkacila. Nudi nwitabuuja anyì?

148 Kùdi inàbànzà ànu lwà paanyimà pèndè apu, musòmbepù. Ùdi munkaci mwà kusambila. Ùdi ne mutù wùmuniyunguluka, mupetè ntàtù mikòdyàkànàngàne. Mmuswè kulekela mfwankà. Dìna dyèndè m'Màndàmù Bordon. Juukà kuulu, Màndàmù Bordon. Mfwanka yèbè ayi yàjikì. Yesù Kilistò ùdi ukusàngàja. Ncìtukù mwanji kumòna bakàji abu kacya bàndela to.

149 Nudi nwitabuuja anyì? Kadi's nudi bamanya ne mèmè kí ngudi mwà kwenza aci to. Awu n'Yesù Kilistò. Ncinyì aci? "Dìyi ndisàkisha, ne bukolè, kutàmba mwelè wà mvità wà nseke yìbìdi, dijinguludi dyà meeji ne mapàngadika a mu mwoyi." N'Dìyi, Yesù Kilistò umwèumwè awu makèèlèlè, leelù, too ne kashidi. Nwènu kanwènakù mwà kwitabuuja nànkù anyì?

150 Tàngilàayi, muntu mulùme nyèyè ewu musòmbè lwà kaaba aka, mwikàle ne kààmunda, disaamà dyà mwoyi. Ncyà bushùwà. Ncyèna mumanyè muntu mulùme ewu to. Ncìtukù mwanji kumumòna to. Kàdi mmwambi. Révérend, Mukalenge Kinsey. Ncyà bushùwà. Udi wìtabuuja anyì, mukalenge? Juukilà kuulu wàkidile dyondopiibwa dyèbè. Yesù Kilistò ùdi ukusàngàja.

151 Wèwè mwinè, udikù mwà kungaanyishila anyi, bu mùdi mwambi? Tentèkèla mukàjèèbè byanza, yèyè ùdi ùsaama disaamà dyà twonyi, ne disaamà dyà mucima, mwikàle ne bujitu bupitèpìte, ne ntàtù mikòdyàkàne. Mutentèkèlè byanza. Nebimumukè, wèwè mwitabùùje.

152 Ambà túng, kùdi muntu musòmbè ànu paanyimà pèèbè mene apu, mmubwikila kùdi mundidimbì wà lufù. Ùdi ne kànsèrè. Muntu awu ùdi ùsaama cyùjà cyà kansèrè, kansèrè, ne dinyunguluka dyà mutù. Dìna dyèndè m'Mukalenge Young. Itabùùjaaku mpindyewu. Yesù Kilistò ùdi ukusàngàja. Udi uciitabuuja anyì? Ùdi uciitaba anyì? Èyo, mukalenge.

¹⁵³ Muntu mulùme nyewù mulààdika, mulààdika kaaba aka pa kalààlù kàà dibunya. Mukalenge, mèmè ncyèna mukumanyè to. Bu ne mvwa mwà kukwondopa, nùнку ndi mucyènzè. Mèmè ndi mwenyì kùdi. Nudi balwilè bònsò njila ewu. Udi muditàicishe bwà kulwa mwab'ewu. Kwèna mwà kusokokakù cìdi cikutàcisha to; kàdi mèmè ncyèna mwà kukwondopa to. Udi mulwè mùneemu ne mukàjèèbè. Nyawù musòmbe mwab'awu muvwàle cinkooci cyà diikala dyà cimuma cyà péche. Ncyà bushùwà. Eyo. Muntu awu mmubwikila kùdi mundidimbì wà lufù; ùdi mwà kwikala ne mwoyi ànu bwà katanci kakesè mpindyewu. Ùdi ne kansèrè.

¹⁵⁴ Wèwè udi pèèbè usaama, mwanèètù wa bakàji. Udi witabuuja ne Nzambi ùdi mwà kungambila cyùdi usaama anyi? Nyimà ngudi ukusaama. Ncyà bushùwà. Aci nì ncyà bushùwà, juukilà kuulu. Eýowà, wápeci dyondopa dyèbè. Cítàbùùjè. Tentèkèlè bàyeebè cýanza.

¹⁵⁵ Udi witabuuja ne mèmè ndi mupròfetà Wendè anyi, mukalenge? Wèwè mushààlè mulààle mwaba awu, s'neùfwe bushùwa. Kwena mwà kwikala ne mwoyi to. Kwàjiki. Bangàngàbukà mbakwèle làà. Kànsèrè nkakukunyè. Mèmè ewu's nkààdikù mumònèmòne byà bitàmbe cyèbè aci byondòpiibwe. Mèmè ncyèna mwà kukwondopa to. Kàdi bu wèwè ànu mwà kuciitaba ne kuciitabuuja nàka's! Udi uciitabuuja anyi? Ki webè mpùngà wa ndekeelu nyèyè ewu. Bikondo byèbè byà ndekeelu mbidì munkaci mwà kupita ebi. Udi uciitabuuja anyi? Wèwè witabuuja, juukà mu kalààlù aku. Pàtukàmu mwimànyine kuulu, mu Dìna dyà Yesù Kilistò! Imànyinà kuulu ne ikàlà mwondòpiibwè, ne pàtukàmu wenda wendela kuulu, mwikàle utùmbisha Nzambi. Muntu kampànda àmukwàtèku ku cýanza mwaba awu, àmwambùlwishèku. Ki yèyè awu's, mwimànyine kuulu.

¹⁵⁶ Mbanganyi mwab'ewu bàdi biitabuuja? Elàayi byanza muulu. Juukilaayi kuulu. Nwènù bakwàbò bàdi baswè kwondopiibwa, juukàayi kuulu, mu Dìna dyà Yesù Kilistò. Elàayi byanza muulu, tùmishàayi Nzambi. Mupàayi lumù ne butùmbi. Mpindyewu sàkidilà Mukalenge bwà dyondopiibwa dyèbè, Yesù Kilistò umwèumwè awu makèlèlè, leelù, too ne kashidi!

¹⁵⁷ Mwanèètù wa balùme, bangàngàbukà's mbapangile. Ewu ki njila mulongolola wa Nzambi. Cítàbùùjè!

¹⁵⁸ Mbanganyi bàdi baswè kwitaba njila mulongolola wa Nzambi? Elàayi byanza muulu nùpe Nzambi lumù, yònsò wa kunùdi, ne nwitabuuje ne nudi bondòpiibwe, mu Dìna dyà Yesù Kilistò. Amen.



NJILA WÀ NZAMBÌ MULONGOLOLA BWA DITÙKÙ EDI LUA64-0206E

(God's Provided Way For This Day)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diinayi dilòlò, mu matùkù à6 à ngondo mwibidi, cidimu cyà 1964, ku Kern County Fairgrounds mu Bakersfield, mu Californie, U.S.A. Ndyumusha pa mukaba wa mēyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org